

PRIMARY BU

2nd Edition :
Tarik :

All rights reserved

Published by
Christian Education Board
Biateram Presbyterian Church Synod.

&

Printed at

(i)

Kum 2013 Biateram Presbyterian Church Synod Inkhompui thurêl lam angka Naipang departmernt a lekhabu reng reng siamintha nok nita rise iti a nit a, kharualin risei rang a (lesson) khom intam ual nita rise iti a nit. Khaangkan lekhabu hi siaminthan neh risei rang (lesson) khom 40 tena isiam a nit bana Nikhua poimo a mang rang ikhop sa a nit. Hi Primary Bu siamintha rangin Upa Lalpuia Darnei, Fiangpui rithlang a nit.

A siam rangtu khomin Synodin a ringat lam takkan a hong siam thei sikin a chungah lomthu ei isir a nit.

lpuia Darnei, B.A Fiangpui in takritai neh thatnem ringai takkan hi lekhabu hih Christian Education Board, Biateram Presbyterian Church Synod nuaia Naipang department Primary Pola hei mang rangin a hong siam thei sikin ilom a om tak takka a chungah C.E. Board in lomthu a isir a nit. Hi lekhabu hih theidorka C.E. Board Checking Komitin a en indik zoi nunga inson a nit. A dikino a om duai lekhom son insual nîng ati, hi lekhabu mangtu hei chungah C.E. Board in ngaidamna ai ngên a nit.

Hi lekhabu hih naipang hein Pathian thudik an riatna neh mâruaitu hong ini ngêt rangin Pathianin thatvur riseh.

Sd/-
(Pu Lalthanmawia Thianglai B.A) (Rev. R.K.Liana Ngamlai)
Senior Secretary,
Christian Education Board
Biateram Presbyterian Church Synod.

Sd/-

Chairman,

(ii)

ZONG OLNA:

Risei rang	Thupui	Phek No.
1.	Israel reng masa tak	
2.	Saula mipui thenka hei	
3.	Reng Saula neh a mipuihei	
4.	Reng nai tlangval	
5.	Thu-oi nona sikin	
6.	Pathianin Samuela Bethlehema	
7.	Jessaian Davida chu	
8.	Davidan mirat Goliatha	
9	Jonathana neh Mikali	
10.	Davida ina rithokin athlan	
11.	Isom isualin Reng isual thu a oi	
12.	Davida Ziglak khua a om lai	
13.	Bera vêngtu naipangte khah	
14.	Reng richi ke bâipa	
15.	Davida thilthon soal	
16.	Reng nai isualin apa reng ram	
17.	Irang sikinim thina Vantirton	
18.	Solomona reng Sakuartung chungah	
19.	Pathianin Solomona armangin a son	
20.	Pumapa Tempil Moria tlanga	
21.	Babel in risâng	
22.	Ruthi thurchi	
23.	Daniala neh a malhei	

Risei rang

24.	Elija tongtaina
25.	Rengnu Estheri
26.	Reng Hezekia
27.	Israelhei inena
28.	Thiampu Elia neh a naihei
29.	Mosia Thurchi
30.	Izip rama Israelhei
31.	Tuipui sen rikan thu
32.	Ruaitu sumpui
33.	Rivana rithoka manna
34.	Jisua suak thurchi
35.	Samari mi tha thurchi
36.	Richongpa neh Lazara
37.	Numeinu nai kaiithoi
38.	Jisua sinrikhêl sinhei
39.	Pumapa zanbu
40.	Jisua ihemdea a om thu

Nikhua poimohei:

- 1) Palm Sunday
- 2) Easter Sunday
- 3) Pentikos
- 4) Krismas thu

PhekNo.

Risei rang - 1
Israel reng masa tak
(1 Samuela 10:17-24)

Thuma: Thurchi ringai nuam iom tak vuansuna hin ei îsîr rang a nit. Israelhei hih mi sang itam takka an nita, khannise roireltu nei ino an nit. Pathian ziangah roireltu ipe rangin an ngêna. Pathianin kum 40 sunga an chungah roireltu rangin Kisa naipa Saula a phun pêk thu hi a nit.

Riseirua: Mi khatka arming Saula Kisa naipa, Benjamina richi a oma. Sunka chu a pân an Sakuartung rimang izong rangin a tira. Kha angkana a lon vêl laiin Pathian Zanthla Samuela omna mun ava thlunga. Pathian in riatin Samuelan Saula chu Israelhei reng rangin siriak a lei inota. Khalai zoro a khan tukhom reng ini rang chu Zanthla hei'n siriak an inot ngai a nit.

Khanung chu Samuelan Israel mipuihei kha Mizpaah a koi bûma. Khataka khan Saula chu Israelhei reng rangin rithlang indet a nit tâk. Saula khah mipui laia an hang indinga, kha mihei laia, arsâng tak anit, tute adâr ten iphâk khom om make. Mipuihei khan "Pathianin reng hi ihoih rise," itin an ipâi vung vung tâka.

Atuna naipanghei khom hi Pathianin a mihei ruaitu rangin Tirton, Pastor, Upa neh ruaitu dang dang rangin nin lian tikin chu Pathianin nangni a phun thei, khannise Pathian iþia lungril rithiang takka oma thuzomin nin om ai tûl a nit.

Richang Spel rang: (Rom 13:1) Mitin an chungah roirêltuhei thu an ôi rang a nit. Pathian iphun ni loiin tute roirêltun om ngai mak' atûn lâia roirêltuhei khom hih Pathian iphun kêng an init.

Tongridon:

1. Tum Israel reng rang Pathian inkung masa tak?
2. Tum Saula siriak inotpu kha?
3. Saula Pa hi im arming?
4. Tu hei'm an reng iloma apâi vung vung hei kha?

Risei rang - 2
Saula mipui thenka hei chu saninzokin an om thu
(1 Samuela 11:1-12)

Risei rang thiltum: Pathianin a mihei chu an irâlhei kuta rithokin a san inzok ngai.

Thuma: Rammuala hin ei ta ranga iþi om tak chu irâlhei hi an nit. Nê that rang, deng nen thei rang itumhei hih an nit. Ama taka zok theina rangin mi tinin zâl tak ei isong ngai anit. Khannise, kha râlhei khah ei inê no rangin chu nê san rang, nê zoipui thei rang ei izong ngai a nit. Ni ranga ulianin nang ihêm rang ati laiin a nêka ulian, ni ulianpa manih nipa manih nang isan rangin ni nuam ngai a nit.

Vuan suna hin, Israel mihei thenka an irâl heiin an changtianga an mitru khel suak pêk zit rangin an tuma kha an irâlhei ata â san rang an ringai thurchi ei irsei rang a nit.

Riseirua: Israel reng masa tak kha tum ai nit ? Saula a nit. Hi Saula ân lal laia hin Jabes-Gilead irûn itumin Amon mi Nahasa a hong risiama. Ani khan Jabes mihei zianga khan, "Nin rengka mitru changtianga nangni khel suak pêk zit kita, khanchu Israel mi murdihei riming siatna hong nîng ata," atia. Kha thu khah an riatin Jabes khua ulian heiin, Israel mi murdi ziangah thu an in puang tâka. Jabes khua om reng Saulan a lei riatin chu, Bezek munah a Sipai lom a bûma atepa, Israelhei khah nuai ithumka, Juda mihei kha singithumka an nit. Saulan a sipaihei kha pol ithumkan a thena. Amon mihei omna riabuk chu an va rûna (doia) ini ding tenah Amon mihei chu an thata. An that bân hei khom an rithek indarh chit tâk. Ama angka hin Jabes mihei chu Pathianin Saula mangin ai saninzok tâk a nit.

Richang spel rang : (Rom 8:31) Kha thu-ah khan im ei ti rang tâk? Pathian ei tiang a ðangin chu tûm ne doi thei ranga?

Tongridon :

1. Jabes khua mihei mitru ikhel suak pêk rang itumpu kha tumani?
2. Pathianin tu manginim Jebes mihei kha ai saninzok?
3. Saula Sipaihei kha an rengkan izakam an init?

Risei rang - 3
Reng Saula neh a mipuihei (1 Sam. 13)

Risei rang thiltum : Pathian iam zoi ino hi thil inkhok tak a nit.

Thuma: Israel naihei Izip rama rithokin an hong suaka tuipui sen an hei tlunga khan, tuipui sen in a lei idana, an nungtiang lak an hei ena Izip sipai itam takka, Sakor chungu chuanguin an hong rizula. Mipui chu rithuak idong, rilon thingin an om tâka. Khannise an ruaitu Mosian, “Dairek unla Pathian sinthotheina ngak rei,” atia, khanchu Pathianin Israel naihei chu khatka khom apop, aliam khom om iloiin Izipa sipaihei a rithokin ân zok tâka. Vuans ûn khoma hin Israel mihei bei’ndonga an omna a Pathian sinthotheina kut ingak aţulna thu ei irsei rang a nit.

Risei rua: Hapta masaa ei irsei khah nin la riat maiin ? Pathianin tu manginim Israelhei ai saninzok kha ? Pathianin Saula mangin Israel mi Jabesa omhei kha ai saninzok a nit.

Vuans ûna ei risei rang khom hi Israel mihei hong irûn itumin Filistia mihei an hong pung khoma. Sakor tali singithumka, Sakor chung chuanga chuangu mi sang ithumka neh mipui tuikhangliana ţiai zâka tam an nit. Mikmasa riabuk an khuar tâka. Israel mihei chu epsorin an om iti an riatin chu an ţia, an rilo ân thing tak takka. Khatka lua khom Pathian iiam zoi om khâi maka. Pathiana ringat ngam khom om khâi make. Saula lua khom sabeidongin, Samuelan ne lei ngak ngit roh aiti khom ngak zoi iloiin, Samuela tho rua rang, Saula tho ranga rithiang ino, halrivam thillân kha a lei lân tâka. Samuela a hong tlungin chu, Saula chu Pathian thupek a zom nuamno sikin a reng nitna chu ai mong rang anit tâk iti a ril tâk. Naipanghei ei ni khom ei beidong lai tak khomin Pathian thupêk izom hi ei ringil rang ni make. Ei vontam, ei tui rihâl lai tak khomin fâk rithiang ino, iin rithiang ino hei hih ei fâkin ei in-rang ni make. Isil ibom ei nei no khomin, mi ta â neipu phalna boiin ei lâk pêk rang ni make. Pathiana ringatin a thupêk ei zom ngitin chu itik lai khomin Pathianin nê thla tlak no nih.

Richang spel rang : Filipi 4:13: Nen râtту Kristaah khan thil tinrêng kî sinthei a nit.

Tongridon: 1. Saulan Pathian thupêk nino im thil ai tho kha?
2. Israel mihei hong idoih itum hei kha tu mihei mani?
3. Saula neh Israel mihei inzok theipu kha tumani?

Risei rang - 4

Reng Nai tlangval (1 Sam. 4:1-46)

Risei rang thiltum: Pathian hi ringat tlâk Pathian a nit.

Thuma: Pathianni masa a ei irsei khah nin la riat maiim ? Israel mihei kha beidong takkan an oma Filistia sipai itam takka an mani doih rangin an hong risiam tâk sikin Saula khom beidong takkan a om iti ei riata. Khaangkana mipui an lung inzîng laiin tlangval khatka iamnaa pasal tha tak thurchi ei irsei rang a nit.

Riseirua: Reng nai tlangval, arming Jonathana an iti hi a oma. Ani khan arâl tluk ichoipa ziangah “Tho sertan ino (Filistia) sipai omnaah fêng ei ti, Rengpan thil anê tho pêk loiim, Ama ta rangin chu mi tam mo, mi roi mo saninzok hi intak make,” atia. Khanchu Jonathana ngirin, “An maah hang rilang eita, nin ziang tiang kin hong maka chu lei om mai rei, an ne tin chu, fe loiin lei om mai eita, kin ziang tiang hong rei, an nê tin chu hang fêng eita, Rengpan ei kuta a ne pêk tâk itina risin ni riseh,” atia. A râltluk ichoipu ne khan an fê tâka. Khante Filistia mihei khan Jonathana neh a râltluk ichoipu khah an lei mu kane chu; hong rei imani nang nin mûng kin ti an lei tia. Khanung chu, Jonathana khan a râltluk ichoipu ziangah khan, “Ne zui ro dua. Rengpan Israelhei kuta ai pêk tâk a nit hih,” atia. Jonathana maah khan Filistia mihei chu an ilîr zung zunga, mi 29 ka vêl chu an hong that zela. Khante râl vêngtu hei neh matianga om mihei chu rilon thingin an om tâka, ninupui a hong inîngsaa Filistia mihei chu tlân siat an tho tâk. Israel mihei mundanga lei ribihe an hong suaka, Filistia mihei chu Israelhei maah an tlom tâk. Pathian iamnaa sikin Filistia sipai sangitam takka hei chu Israel hein an inê tâk a nit.

Iamnan thutiam roi npui tak itun Pathian bang rinêl ngitin chu, thotheiino ranga lang khom iamnan itho thei a nit.

Richang spel rang: Efesi 2:8: Iamna sika lungkhamnaa saninring nin nit, amakhah nangmania rithoka suak ni mak e, Pathian thilpêk a nit.

Tongridon :

1. Tu iamna sikinim Filistia mihei kha ine an init?
2. Jonathana hi tu nai mani?
3. Ingka sikinim saninring ei init rang?

Risei rang -5

Thu oi nona sikin Reng Saula khan a rengam a chan tak. (1 Samuela 14:47; 1 Samuel 15:35)

Risei rang thiltum : Pathian thu-oi nuam ino hei chu an chungah thil thano a tung ngai.

Thuma: Saula khan Pathian Zanthla Samuela thu zom nuam iloiin hâl rivâm thillân a lei tho tâka, iti thurchi ei risei tâka. Vuansûn khoma hin Pathian thu zom nuam iloia a omna thu hi ei irsei nok rang a nit. Khaangkana a om sikin a reng nitna Pathianin a in mong pêk tâk a nit. Pathian thupêk tak sonino hi thil ti om tak a nit.

Risei rua: Saula pa riming hi Kisa a nit. A lomnu riming chu Ahinoam a nit. Naiipa ithumka neh nupang inika an nei. A naiipa hei riming chu Jonathana, Isvia neh Malkisua an nit. Khante an nai nupanghei riming chu Merabi neh Mikal an nit. Khante, a sipai ulian tak riming chu Nera naipa Abner a nit. Saula ziangah Pathianin “Amelek mihei va doih inla, an thil hei rêng rêng khom zua no roh, an ranhei neh ami neh an rengkan that vang rei,” atia. Saula neh a sipai hein Amelek irâl chu an va rûna. Khannise Pathian tilam nino takkan Amelakhei rengpa Agag chu that iloiin â ringin an hong thuaia, khabana bera neh sial a thano neh an idit ino hei ka an thata, an idit dit, a tha neh â thâihe chu that iloiin a ringin an hong kâia. Khante Samuela kha Saula ziangah a va fea, Pathian tilam zom iloiin, Amelak mihei an rengka that vang rang ai ti kha tho loiin an rengpa Agaga khom â ringin a hong thuisa sikin Samuelan Saula ziangah “Vuansûna rithokin Rengpan Israel ram hi nang ai sut tâk a nit, ni ranga tha ual ni suapuipa ai pêk tâk a nit,” itin â rila. Khania rithokin Saula chu athi ni denin Samuelan va sirh (ithlo) khâi make. Pathian thupêk zom ino hi thil inkhok tak ai nit ngai a nit. Jona khomin Pathian thupêk a zomno sikin thlipui a tuanga, ngapuiin â lema. Khasikin

tukhom Pathian thupêk oi nuam ino chu an ta rangin thil inkhok tak nîng ati.

Richang spel rang: Efesi 6:1-3: Naipanghei, Pumapaah khan nin nu neh nin pahei thu zôm rei, amakhah thil dik tak a nit. “Ni nu neh ni pa ngîk roh,” iti hih thupêk lâia tonginkung nei masa tak a nit. “Khanchu, ni ta rangin thâng a ta, rinêngah ni dam sôt a ti,” iti a nit.

Tongridon:

1. Saula lomnu im arming?
2. Saula sipai ulian tak kha im arming?
3. Saulan naiipa izakam ai nei i-im an riming?

-7-

Risei rang 6 **Pathianin Samuela Bethlehem khua a tir** **(1 Samuela 16:13)**

Risei rang thiltum: Pathianin chungtianga melthatna en maka lungril sungtianga thatna ai en lem a nit.

Thuma: Saula hi miriam ilian, ruak i tha tak nikhomse, a lungril a thatno sikin arthul rangin midang a irtlang lem rang tâk a nit. Pathianin putianga thatna ringot en ngai maka, lungril taka thu oina hei, idikna nei hei ai en lem ngai a nit.

Riseirua: Pathianin Israel reng masa tak ranga siriak a înot khah tumani ? Saula hi kum somilika reng rangin Pathianin ân kunga, khannise a reng chang sunga hin Pathian thupêk a zomno sikin a chungah Pathian â lungtluk maka. Khasikin atun chu arthula reng rangin Jessaia naipa Davida chu Pathianin a irthlang tâk a nit. Pathianin Samuela ziangah, “Ni sarkia khan siriak thun insip inla Bethlehem khua a Jessaia naipa siriak înot rangin fe roh,” atia. Samuela chu a fê tâka. Jessaia neh a naihei chu a ziangah an hong rilanga. Amasa takin Eliaba a hong, nikhomse Pumapan Samuela ziangah, a mêl neh adung risângna tiang en no roh, ama hi chu ki îdit ino a nit, Pumapan miriam en danin en ngai maka, miriam inchu putianga â lang dânin ei ien ngai a nit a. Pumapan chu lungril tiang ai en ngai a nit,” atia. Jessaian Abinabad a hang koi noka, kha khom khah Pumapa irthlang kha la ni nok maka. Jessaia khan anai pasal sarika hei ân lang zit khomin Pumapa irthlang nuam la om maka. A nungkhona naipang tak bera hola om ngai khah an koia. Ama kha amu kaneh chu Samuelan siriak a nota. Siriak a hong inota rithokin Pumapa Rithla chu natinsat takkan khania rithokin Davida chungah khan a hong tlung tâk. Israel reng ithar rangin rithlang chu a hong inith tâk a nit.

Richang spel rang: I Samuel 16:17: Saula khan â somhei ziangah khan, “A tum ithiam tak kha ne zong pêk unla, ki ziangah hong thui rei,” a ti a.

Tongridon:

1. Pathian lungdo reng rithlang kha tumani?
2. Davida pa kha im arming?
3. Eliaba hi tu nâi mani?
4. Davida hi tu khua om ngai mani?

-8-

Risei rang -7

Jessian Davida chu Reng Saula va pan (kan rangin a tir)

Risei rang thiltum : Pathian itî hei chu miriam neh Pathian lungthlukin an om ngai.

Thuma: Israel reng Saula chu Pathian thupêk a zomno sikin Pumapa rithlân a mâka, Pumapa itir ramrilîn ân buaia, khante a sinitho ngai heiin Saula ziangah, ramrilîn nang ân buai zoroa òngtang (Perkhuang) nang isuk pêk ngai rang mi nang zong pêk kin ta, khanchu ramrilîn nang ân buai zoron òngtang nang suk pêk ata, hong òha nok ngai ni ti an ti pêka. Saula khomin òha atia, khanchu Jessaia naipa Davida Bethlehem kho mi chu an va koi tâka.

Riseirua: Jessaia nai pasalhei laia a naipang tak kha Davida a nita. Jessaian ibai neh kêlte Saula pe rang inchoiin a naipa Davida chu Saula ziangah a tîr tâka. Saulan ani khah a lei mun chu a lei lom tak taka, a râltluk ichoitua a lei inòanga. Pathian itir ramrilîn ân buai kipa, Davida khan òngtang a suk pêka khanchu Saula kha ramrilîn ai mâk ngai a nit.

Davida chu tlangvalte nikhomse Pathian neh miriam mit tlungin a oma Pathian itî mi anit sikin a ziangah Pathianin ai ompui mai a nit.

Richang spel rang: I Samuela 16:18: A ziangah om tlangvâl khatkah khan a sâm a, a ziangah, “Bethlehem kho mi Jessaia naipa ki mu tâk a, kha mi khah irîhoi tum ithiam tak a nit. Khabanah, ani khah mi hâi neh mêl itîha tak, sipai itîha tak neh thusîr ithiam tak a nit a, a ziangah Pumapa khom ai om a nit,” a ti a.

Òngridon:

1. Saula hi ithom òngtang isuk pêk ai nang?
2. Davida hi itho sikinim Pathian neh miriam mit tlungin ai om?
3. Saula hi ithom Pumapa rithlân ai mâk?

Risei rang - 8

Davidan mirat Goliatha a that
(1 Samuela 17:1-54)

Risei rang thiltum: Pathian òangna tiang chu an râk ngai.

Thuma: Ridoih hi nin mu tak ngaiim ? Nin khua tûm a râk tak ? Vuan suna hin milian, mirât Goliathan Pathian mi Israelhei a esêl thu ei irsei rang a nit. Goliatha hi milian, mirât nikhomse, tlangvalte makungah ai tlom tâk a nit. Pathianin a òangpui non chu milian, mirât nikhomse ite ni thei make.

Riseirua: Filistia sipaihei neh Israel sipaihei chu itlâng pangah râlrisanin an oma. An kêra khan phâiruam a oma. Filistia sipai arming Goliatha hi a oma. Ani hi mùk irukka khâpka risâng a nit. Thîr toko a khuma, òangpho a hâka, arngal khom thîrin ân koka. A nungtiang thal bûr arva a, ifei ilian a choisa a. Sûn somilika sung sûtin Israel sipai mi khatka risual a ot ngaia, a dokpu tianga mipuihei chu â râtpu boi (suak) ichang rang atia. Kha angkana a khêk laiin Davidan a riata, â doih rangin a fê tâka. Davida chu râltluk khom nei make, â rolte neh lungchirit ichêng ringaka bera a hol zoroa a irva ngai choliten arva a, a sâili a choia a hei fê a. Goliathan a lei mun chu, “Ui im ki nita irol neh ni hong, nisa kha iva neh ramnuai ramsa hei in fâng ki ti,” atia. Davidan chu, “Nang chu nê doihna rangin râltluk chemsei, ifei neh ipho ni hong choia, kei chu Sipaihei Rengpa Israelhei Pathian Pumapa rimingin ki hong a nit, “Vuansûna hin nang that ki ta Filistia sipaihei sa hi iva hei neh ramsa heiin fâng an ti, “atia. Davidan a cholial lung chiritte kha a lâka âchala a hei sâia, Goliatha chu a khupin a bok rupa aring ava tan pêk tâka. Khan chu Filistia sipaihei chu an rengkan lâizâm an tho tâk. Israel sipai heiin an rizûla an inê tâk. An milianpa kha Davidan a that pêk tâk sikin.

Richang spel rang : I Samuela 17:54: Davida khan Goliatha lu khah a lâk a, Jerusalemah a chôi a; khannisela, Goliatha râlthluk kha chu a puan inah a sia a.

Tongridon :

1. Filistia sipai ilianpa kha im arming ?
2. Kha milian, mirât kha tûm a that ?
3. Davidan Filistia râlpa kha ingkanim a îne kha
4. Davidan Filistia râlpa Goliatha doih a fê a khan im ati pêk ?
5. Goliatha neh Davida ridoih ranga an ritonga khan Goliathan Davida ziangah im ati pêk? Davidan ingkanim ai sâm kha?

Risei rang - 9

Jonathana neh Mikali (1 Samuela 19:1-20:2)

Risei rang thiltum : Pathianin a mihei chu an tlom lai tak khomin lungin khamtu rang a pêk ngai.

Thuma: Irâl ata nen zok thei chu Pathian bang anit. Aman chu mangrua, ithil thil manih, miriam neh thildang dang a ne ngaitua pêk ngai. Davida khom reng Saulan ithat a tum laiin a san rangin Jonathana neh Mikali reng nainu ânkung pêk thlia thu vuansûn ahin ei irsei rang a nit.

Riseirua: Masa a ei riseina ah Davida thina rang izongpu kha tûm ai nit nin la riat maiim ? Reng Saulan Jonathana neh a sipai hei khah Davida that rangin thu a pêka. Khannise Jonathanan Davida kha lung ai thlung tak tak a nit sikin a pân ithat ai tum thu khah Davida a rila, khan tak ata chu Davida arbîk tâk. Khante Jonathanan apa Saula ziangah Davida hi reng Saula ta ranga a kâm omzia hei a sîr pêka, khabana Davida hi that loi rangin tong ânkung tâk. Khan sûnka chu Saula ifei ichoia a thung laiin Pumapa itir ramrilin a hong inbuaia, Davidan tingtang ân per pêka, kha zoro lai taka khan Saulan Davida chu â feiin isun that a tuma, khannise Davida chu arhîn thar sikin bang a sun tlit tâk. Khante Reng Saula khan Davida kha a in tianga ruang lei va chuan rangin mi a tira, ama kha Mikalin a riat sikin Davida chu tukver tiang a sua tâka, Saula kut ata rithokin ai zok a nit. Davida chu Rama khua a Samuela ziang ava tlunga Saula tho thlia tinreng ava ril tâk. (Mikalin Davida a san isua thlia thurchi chu (I Samuela 19:11-17) sung hih itepa isîr rang a nit).

Richang spel rang : I Samuela 19:2: Khanchu, Jonathana khan Davida ziangah, “Ki pa Saula hin nang ithat a tum a; khasikin, naktûk zîngah chu ridîn inla, mun rithupah ribih tian roh.

- Tongridon :**
1. Davida zokna ranga â ngaitua mi inika hei khah tuhei mani?
 2. Mikalin Davida kha ingkanim ai san isua?
 3. Davida takâm ai rot (tlan rimang)?

Risei rang 10
Davida ina rithokin a thlan rimang
(1 Samuel 21:1-22:5)

Risei rang thiltum: Misual hi ei irdoipui rang ni make

Thuma: Pathianni masa a khan Davida chu ite thon sualna boi riain kan, narsana sikin reng Saula khan ithat rang a nuam iti ei riata. Vuansûn chu Davida hin reng Saula chu ridoipui nuam loiin a mâk rak iti thu hi ei irsei rang a nit.

Riseirua: Naipanghei, nangni te nin malheiin risual an nuamin arsualpui nin nuam zel ngaiim? Davida chu ite sualna nei iloiin, reng Saulan ithat rangin a zonga, nikhomse, a man chu lei doih nuam maka, iron ai rot pêk a nit. Nob khua Thiampu Ahimeleka ziangah a fea, ama khan Thiampu khan ibai rithiang, Thiampu hei bang ifâk ngai khah Davida neh a loma hei a pêka, kha banah khandaih Davidan Filistia milianpa ta ai lâk pêk khah, Thiampu khan Davida zianga a pêksa a. Khante Davida chu khan taka rithokin a thlân noka, Gath reng Akisa zianga a fea.

Akisa somhei khan Davida chu an la riat iti Davidan a riatin chu Gath rengpa kha aña, invêt om a thoa, khanung chu Gath rengpa khan a ûm tâk. Khan taka rithokin Davida kha a suaka Adullam ipûka a thlân lûta. A urenghei neh apa suapuihei reng reng chu a ziangah an zu fea. Khante lunginzîng neh ritâng inei murdi hei kan an zur bêla, Davida chu an ruaitun a tanga. Mi 400 vêl a ziang tiang an tâng tâka. Adullam ipûka rithokin Moab ram Mizpa a afea, Moab reng zianga khan, “Pathianin chu, ki nu neh ki pahei hi ni zianga lei om riseh,” atia. Khante Zanthla Gath-an Davida chu Judai ram tianga ife rangin ati pêka, khanchu a suaka Herel ramah a lût tâk.

Richang spel rang : Matthaia 5:39: keiman chu nin chungah thonsualhei chungah phuba la no rei. Tukhomin ne biang changtiang a bênin chu voitiang khom do pêk sa rei.

Tongridon :

1. Davida ibai rithiang kha tûm alei ipe?
2. Ithom Davida laizâm ai tho?
3. Davida tângpuihei mi izakâm an inithat?

Risei rang 11
Isom isualin reng isual thu a oi
(1 Samuel 22:5-23)

Risei rang thiltum Thil isual itho-ah ei tâng rang ni make.

Thuma: Miriam rithat tim nin mû tâk ngai? Vuansûna hin mi khatkan 85 a that dân thu ei irsei rang a nit.

Riseirua: Reng Saula chu Rama khua Tamaris thingkung thuaia a tâng. A kol vêla khan a som murdihei chu an ngira. Saulan an ziangah, “Nangmani Benjamina mihei, ringai ta u, Jessaia naipa hin loihei, grep rikul hei, nangni ai pêk rang mani ? A nit nole sâng, sâng chungah ruaitun nangni ai siam rang mani ? Nin rengka hin nin ne fia a, ki naipa khomin Jessaia naipa ziangah hin thu a thlung iti khom nê ril nuam mak cheia, atia.” Khanchu Edom mi Doega khan a sâma, “Jessaia naipa chu Nob khuah Ahimaleka ziangah a hongga, Ahimalekan Pathian a zong puia, ibai neh khandaih khom a pêk ki mu,” atia. Khanung chu reng Saulan Nob khua Thiampu murdihei ân koia, reng Saulan Thiampu hei an rengka that rangin a sipaihei thu a pêka. Khannise a sipaiheiin chu reng thupêk, Thiampu hei ithat rangin chu an kut in châng nuam maka.

Khante, reng Saulan Doega ziangah, “nangman Thiampuhei hih an rengkan that vang roh,” ati pêka. Khante Doega khan Thiampu zakua hâk ngat mi 85 a thata, khabana Nob Thiampuhei khua mi chu nupang, ipa, naipang neh an Ui-Arhei khom khandaih in a that riaia. Abiathara, Ahimaleka naipa bang hih idamin a thlâna a zoka, khanchu Davida ziang tiang a fê tâk.

Ei ni chu reng isualpa neh a som isualpa Doega angka hin ei om rang ni make. Mi lunginkham ino hei chu, an sual man an imu ngai a nit.

Richang spel rang: Matthaia 5:7: “Mi lunginkham ngaihei chu an ham a tâng; Pathianin lung inkham a ti.

Tongridon :

1. Reng isualpa hih îm arming?
2. Isom isualpa khah îm arming?
3. Thiampuhei khah izakâm an ithat?
4. Thiampuhei ithattu khah tumani?

Risei rang 12
Davida Ziglag khuah a om lai thu
(1 Samuel 29:1-30)

**Risei rang thiltum: Pathianin ruaitu ranga a inkung hi
marit ei tho rang a nit.**

Thuma: Pathianni masa a khan Filistia mihei neh Israelhei an ridoih thu ei riseia, kha ridoih a khan Davida neh a mihei chu Filistia renghei khan ridoihna fe rangin nuampui mak sikin, lam ritenna Ziklag khua tiang ipanin an kîr nok tâk. Vuansûna hin Davida Ziklag khuah a om lai thu ei irsei rang a nit.

Riseirua: Ziklag khua hih tak rama om mani ni riat tâk ngaiim?

Ziklag khua hi Gath reng Akisa'n Davida neh a loma hei omna ranga ai pêk a nit. Hi khua hi Amelek miheiin an hong rûna, Nupang, naipang neh an Sial, Ui, Ar an lâkpêk riaia, a khua khom an hâl pêka. Davida sipai heiin an rizula irâlhei kha an va nea. An râl lâk richon hei reng reng an va sut nok riaia. Ziklag khua tiang an hong kîr nok tâk.

Khante, Davida chu Ziklag khuah a sipaihei neh a champuinu hei, Abinoami neh Abigaili hei neh an oma. Kha zoro a khan mi khatka ridoih buala rithokin a hong, ani khan ridoihna mi tam takka an thia, Saula neh a naipa Jonathana khom an thi tâk iti thu a hong irila. Kha mi ngir khan, Saula chu ifei ichoiin a ngir lai, a râlhei Sakor talia chuang neh Sakor chung a chuang heiin an hong nâi tâka, Saulan ne hong that zel ta roh, ki lai ring mai kêng, buainan a ne irkhu a nit tâk a tia. Ai ring thei khâi ino rang iti ki riat sikin ki that tâka, itin a rila. Kha thu kha Davidan a riat kaneh a puansil hei a pot thlera, Saula neh Jonathana chu natinsat takka sûnin aţap tâka. Israel midang hei khomin an tuangpui tak taka. Khante Amelek mi, Saula thattu chu Davidan a loma mihei laia khatka zianga ithat rangin a rila, Pathian siriak inot Saula kha a that sikin.

Richang spel rang: I Samuel 27:7: Davida kha Filistiahei ramah khan kumkah neh thla likah ai om a nit.

- Tongridon:**
1. Ziklag khua Davida petu kha tûm ai nit?
 2. Davida lomnu inika hei kha im an riming?
 3. Davida kha reng Saula neh Jonathana thi thu a riatin ingkam a om?

Risei rang 13
Bera vengtu Naipangte (2 Samuel 2:3; 5:5)

Risei rang thiltum: Pathian tong ti inkhêl ngai mak.

Thuma: Davida chu ipate a nit laia, apa bera lom a enkol laiin Samuelan Israel reng ini ranga siriak a zu inot anit. Pathianin a inkung angka ngeiin Israel reng a hong nit tâk. Pathian thu ânkhêl ngaino sikin. Vuansûna hin Israelhei neh Judahei reng a hong nit dân thu ei irsei rang a nit.

Riseirua: Israel reng masa tak kha tûm ai nit nin la riatim ? Saula a nit. Saula kha athi zoiin chu Davida chu a lomnu inikahei neh a zianga om ngai mi murdihei kha Ziklaga rithokin an fê suaka. Hebrona om mun an va khuara. Hebrona a om laia hin Judai rama mihei khan an chung a reng ichang rangin siriak an hong inot tâka. Hi zoro laia hin Saula naipa Isbosetha'n Israelhei chungah roi a rêla. Saula richi hei neh Davida loma hei chu isot ianka chu an ridoih a. Davida loma hei chu an hong rât ual uala, Pathianin Davida chu a tangpui maia, khanung chu Abnera, Saula dam laia a sipai ruaitu khah Isbosetha khomin sipai ruaitu ngirin a hong manga. Khannise Davida sipai ruaitu Joaban a thata, khabana Isbosetha zâlmuna a zâl laiin Beeroth mi Rekaba neh Baana chu a inah an va lûta an va thata, a lu an tana Hebrona, Davida zianga an hong choia. Davidan Isbosatha lu a lei mun chu ilom nekan a ning a thika, Isbosetha thattu mi inika hei a that seng seng tâk.

Davida chu kim 30 ka mi anitin reng a hong chang tâk. Hebrona hin Judahei chung a kum sarika neh thla rukka ân lala. Hebrona a om sungin a nupui irukka heia rithokin nai pasal irukka a nei Amnon, Kilbab, Absalom, Adonija, Safetia neh Ithreama an nit.

Isbosetha athi zoiin Davida chu Hebrona rithokin Jerusalema arthona. Jerusalema hin Juda neh Israelhei chung a kum 33 reng

ichangin a înlal a nit. Jerusalema a om nungah hin, nupui dang khom ala nei sa mai. Jerusalema a om nunga a naihei chu hi hei hih an nit. Samu, Sobap, Nathan, Solomon, Ibara, Elisua, Nefega, Jafia, Elisama, Eliat neh Elifelet an nit. Davidan lal sung hih a rengkan kum somilika neh thla rukka a nit.

Richang spel rang: Lapui 34:4: Pumapa chu ke sam a, khanchu, ani khan a ne sâm a; ki ãina murdi ata a ne sanisua tâk.

Tongridon:

1. Davida kha Hebrona khan tuhei chungâm reng ai chang?
2. Hebrona Davida nupuihei kha îm an riming?
3. Davida kha kum izakâm reng ichangin a înlal?
4. Davida kha kum izaka mi anit inim reng ai chang phut kha?

Risei rang 14
Reng richi kebaipa chung a Davida that thlia
(2 Samuela 9:1-13)

Risei rang thiltum: Risan risak rang ei nit.

Thuma: Reng Saulan Davida ithat rang ati laia lung lei ithlung ngaipu Jonathana khan naiipa khatka ke bâi a neia, kha mipa chung a Davida thil tho dân kha vuansûna hin ei irsei rang a nit.

Riseirua: Davida chu Juda neh Israelhei chungah reng a hong nit inchu Jonathana sikin a lungkhamna kha Saula insung mihei chungah inlang a nuama. Saula suapuihei ,isom arming Zeba chu reng Davida ziangah a fea. Jonathanan nai pasal khatka a neia arming Mefiboseh an iti ngai a om iti ava rila. Mefiboseh hi a kêbâi a nita. Saula neh Jonathana thi thurchi an lei riat laia khan ani hih kum 5 ka mi a nita, a enkoltûn iropui rang a tum laia khan, an rimot rai sikin lampuia an ibaah a kê hi ai oi tâk a nit.

Mefiboseh kha Davidan a koia a ziangah “Ni pa Jonathana sikin ni chung a lungkhamna ki inlang rang a nit, ni pu Saula reng ram hei murdi kha nang in nei nok kita, khante nangkhom ki dochamah bu ni hong nêk mai ngai rang anit,” atia. Ai ti angka takin Davidan Jonathana naiipa Mefiboseh chungah khan a tho tâk

Richang spel rang: Galatia 6:2: Nin puakpêl risan risak ngai rei; khanchu, Krista dân khah nin izôm nîng a ti.

- Tongridon :**
1. Jonathana nâi a kêbâi kha im arming?
 2. Itho sika a kêbâi im ai nit?
 3. Davidan a kêbâipu ziangah ingkam lungkhamna a inlang?

Risei rang 15
Davida thiltho sual neh dengitheia a om thu
(2 Samuela 11:4-12;25)

Risei rang thiltum: Pathianin sual hih ringai nuam ngai mak.

Thuma: Reng Saula thi nunga khan Juda neh Israelhei murdi chungah khan Davida chu reng a hong chang tâka. Ani hi Pathian lung ithluka reng hong ichang nikhomse, voika chu Pathian theimâk tak thil isual ai tho a nit. Khasika khan Pathianin deng a inthei tâk a nit. Hi thu hih vuansûna hin ei irsei rang anit.

Riseirua: Sûnka chu Joaba loma sipaihei irâl idoih an fê karin, Davida chu kholoji tiang ni thlâk ri-olin a in chungah hin a hang lona. Khanchu nupang khatka hi tui arsil lai a hei mua, a mel khom a tha ok a nita. Ama kha Bethsebi Uria nupui a nit. Davidan kha nupangnu kha a vâk koia a lei ripolpui zela, Nakana chu nâi a hong vong tâka. Davida khan mi nupui nâi an vong iti a hong riatin chu, a pasal Uria ridoih buala om khah archa tâka. Ani kha a hongin chu a nupui ziangah va riak rangin a tira. Khannisela Uria chu apu Joaba neh a rualhei irâl ridoihna buala om in, ani chu insungah a nupui neh a naihei ziangah va zâl rangin nuam maka. Davidan Uria kha a nupui neh a naihei ziangah ava riak nuamno thu kha a riatin chu lekha arziaka a sipai ulianpu Joaba rangin Uria kha ânchoi tâka. Hi lekhatona hin Uria hi irâl doihnaah ma insaah, irâlin an ithat rang iti thu a nit.

Kha lekhaton ichoiin Uria chu a fê nok tâka. Lekhaton kha Joaba a pêka, khanchu Joaba khan irâl intaknaah a masa takah a tira, irâl heiin Uria chu an that tâk.

Khante Davidan Uria kha irâlin an that tâk iti a riat kaneh chu Bethsebi kha nupuiin a nei tâk. Davidan kha thil isual tak atho sikin Pathian a chungah a ning a thik tâka. Zanthla Nathana chu Davida ziangah a tira, Uria nupui dikino takkan a sut sikin a chungah dengtheina ai thlung a nit tâk iti ava rila. Khanchu Davida hin a thil thonsual a hong riatin chu ân sîr tak taka, Pathian ziangah ngaidamna a zonga.

(Lapui No.51) Hih Davida ngaidam zongna thu a nit. Khante Davidan a nupui Uria nupui ata kha nâi a hong neia, khannise a thonsualna sikin Pathianin in ring pêk make.

Richang spel rang: Rom 6:23: Sual man chu thina a nit a; Pathian thiltlongpêk chu ei Pumapa Krista Jisuaah khan kumtluang ringna a nit.

Tongridon: 1. Davidan tu nupui im ai sut kha?
2. Davida sipai ulianpu kha im arming?

- 21 -

Risei rang - 16
Reng nai isualin apa reng ram iruk pek a tum
(2 Samuela 15:1-31)

**Risei rang thiltum: Thilsual itho rangin thu phiar rûk
itho rangni mak.**

Thuma: Naipanghei nin rualhei siatna rang thu nin ngaitua ngaiim? Vuansûna hin Absaloman reng ichang a ngakmo sikin apa thina rangin thu a phiar rûka, mipui itam takka akoi bûmna thu ei irsei rang a nit.

Riseirua: Reng Davida Hebrona a om laia khan nai pasal irukka a neia. An riming hei kha nin la riat maiim ? A nai ipa a thumna kha arming Absaloma a nit. Absaloma hih reng ichang a ngakmo a, apa thimâ khomin apa rithula reng a chang rang dân a ngaituaah, zîng taka a thoia kul kotbâia a lei ngira, mi tukhom reng zianga hong hei murdi kha a lei koia, a lei ithlêma. Hi ram roireltu'n ne siam unla chu ifel takkan hi rama hin roirel ki ti a lei ti a. Amah chibai i-ûn ranga hong hei murdi kha a lei loma, a lei fopa. Kha angkan a tho sikin Israel mipui itam takka lungril chu a tiang a hîpa. Khante Absaloma khan "Hebron khua PUMAPA zianga ki thutiam ilen rangin nen fê roh," itin apa ziangah a ngena. Absaloma chu Hebrona a fê tâka. Mi rizanika Jerusalema rithokin an fe saa. Khante Israel nam murdihei laiah totorot iri an riat kaneh chu Absaloma Hebrona reng a nit tâk itia khêk rangin he a bea. Khanung chu Absaloma tiang mi an hong pung tûr tûra. Kha thu kha a riat kaneh chu Davida chu a reng in ata a suaka ramkar tiang â tlân tâka. Absaloma neh a loma heiin Jerusalem chu an hong lua tâk.

Richang spel rang: I Petera 5:5-6: Khangkah ngirin, nangni vanglaihei, ulianhei thu zôm rei. Nin rêngkan ringaichînnâa rithlukin sin ritho pêk risak rei. Pathian Thubûn, "Pathianin lârripâkhei â kal a ringaichînhei chu lung ân kham ngai," ai ti a nit. Khasikin, a zoro taka chôiinrisânga nin om theina rangin Pathian kut irât tak nuaiah ribil rei.

-22-

Tongridon:

1. Davidan Hebrona khan nai pasal izakâm ai nei?
2. Tûm reng Davida ram richupui rang iti pu ka?
3. Absaloma hih Davida nai apsal izaka nâm ai nit?

Risei rang 17

Irang sikinim thina vantirtonin Jerusalem kha a hong ithlo (2 Samuel 24:11-26)

Risei rang thiltum: Pathianin a Vantirton hei imangin isualhei roi arêl pêk ngai.

Thuma: Davida kha Uria nupui a sutna sikin Pathian a ning a thik iti ei hong risei tâka. Vuansûn khoma hin Davidan Pathian nuamno lama a sintho ei irsei rang a nit.

Riseirua: Soitanan Davida chu Israelhei zon tep nuamna ân neia. Ama kha Pathian theimâk neh nuamno lam tak a nita. Naipanghei nangni khom, Soitanan nin lungri la soal sin nuamna nangni a innei thei a nit. Joaban Davida ziangah Pathian nuamno lam a nit sikin mizon itep tul ual make itin a ril khoma, Davidan mipui itep nget rangin thu a pêka. Joaba neh sipai ruaitu dang heiin Davida mihei chu an tep tâka. Khante thla kuakka neh sùn sominika a hong hek tenan chu Jerusalem an hong thlung nok tâka. Miriam tam zât chu Joaban reng Davida ziangah a rila, Israel ramah khandaih ilek thei ringot nuai iriatka an oma, khabana Juda mi nuai ringaka an omsa a.

Hi thila hin Pathian a ning a thika Zanthla Gada chu Davida ziangah a tir tâka. Ani khan Davida ziangah, Pathianin dengtheina chi thumka laia khatka ni nuam tak rithlang rangin ati pêka, kha dengtheina ithumka hei laia a khatna chu kum ithumka sung tât ithla, anikna chu irâl heiin khandaiha thla thumka inea om, athumna chu sùn thumka sunga rî inlêng rang iti hei hi an nit. Davidan sùn thumka sung rî lêng rang kha arthlang tâka. Khanchu Pumapan Thina Vantirton a tira rî ân lêng tâka, Israelhei kha sîngsarika an thi tâka. Khante Vantirtonin Jerusalem kha iseh chit ranga a kut a hang inchâng rang kha Pathian nuam khâi maka, Vantirton ziangah khan tho khâino roh ânrup tât a tia. Khante Davidan mi that ngaipu Vantirton kha a mun chu, Pathian ziangah soal thupha choina a neia. Pathian maicham isiamin Pathian â son tâka.

David a hi Pathianah ringat iloiin a sipai tamna sika arsongnaah hin Pathian a ning ai thik a nit.

Richang spel rang: 2 Kor.10:17: Nikhomsela, Pathian Thubûn ai ti angka, “A song kan Pumapa chu song riseh.”

Ṭongridon: 1. Pathian kha ithom David a chungah a ning ai thik?
2. Pathianin Israelhei kha ingkanim deng a înthei?
3. Israelhei kha ingkam an ithi kha?
4. Israel mi khandaih ilek thei kha izakâm an init kha?

-25-

Risei rang - 18

Solomona reng sakuartung chungah a chuang (1 Renghei 1:23-2;2)

Risei rang thiltum: Ei dong rang tum chu rimot bâk rang ni make, a zoro takkan ei idong nget ngai a nit.

Thuma: Reng Davidan nai ipa itam takka a nei iti ei hong risei tâka. Ala dam laiin Absaloma reng ichang a tuma. Khannise reng ṭhungmun chu Solomona dongtum rang piala siam a nita. Vuansûna hin Solomona reng a hong chang dân ei irsei rang a nit.

Riseirua: Reng David a chu athi rang zoro a hong nâi tâka, Thiampu Zadoka, Zanthla Nathana neh Jehoiada naipa Benaia hei hi Solomona renga siam rangin ati pêka. Khante an ni khan reng Sakuartung chungah Solomona chu an inchuanga, Gihon muna an fe a, ama khan Thiampu Zadokan siriak a nota, bekul a tuma. Bekul arî kipah mitinin “Pathianin Solomona inzok rise” itin an ikhêk dur dura. Khante ani kha apa David a ṭhungmunah a ṭhung tâka.

Solomonan ringai intlom takkan apa thu a lei ngak ngei ngeia, a urenghei angka ama thu’ n reng lei ichâng tum maka. A nungah chu a zoro takkan Davidan a ureng danghei laiah Solomona chu rengin ai siam tâk a nit.

Richang spel rang: Efesi 6:1: Naipanghei, Pumapaah khan nin nu neh nin pahei thu zôm rei, amakhah thil dik tak a nit.

Ṭongridon:

1. Solomona siriak inottu kha tumani?
2. Solomona hi tak munam rengin an iphun?
3. Solomona renga an phun laiin mipui ikhêk hei khan im an iti?

Risei rang 19
Pathianin Solomona armangin a son
(1 Renghei 3:3-15; 4:29-34)

Risei rang thiltum: Pathian chu thil tinreng ne pe theitu a nit.

Thuma: Rammuala miriam laiah tùm a var tak ? India rama mivar ei iti hei chu Nehru neh Gandhi hei an nit. An vâz tak tak mîn an ti ngai. Khannise hi mihei nêka vâz uala riming inthang ual mi a lei om tâka, arming chu Solomona a nit. Solomona hi itho sikim ama dorka a vâz theina, vuansûna hin ei irsei rang a nit.

Riseirua: Tùm mivâz tak ei iti kha ? Reng Solomona a nit. Voika chu Solomona ziangah armangin Pathian a zuang inlâra. Pathianin Solomona ziangah “Ne ni roh im nang ki pêk rang” atia. Solomonan a sâma “O Rengpa Pathian nangman ki pa Davida ðhungmunah ni nen ðhung tâka, khannise keichu naipang pai ki nita, khasikin ni mihei laia roi ki rêl thiam theina rangin riatna lungril ne pen la, asia neh aþha kê thlei theina rangin” atia. Solomonan Pathian zianga a thil ninaah hin Pathian ân lom tak taka, ama ta rang dam sotna hei, richongna hei, neh â râl hei thina rang khom ni loiin roirel thiamna a ni sikin, ani lam angka takin Pathianin riatna neh varna ai pêk tâk a nit. Khabana ai nisano khom richongna a pêksa tâk. Khante Pathianin “Ki thupêk hei ni zoma ki lampuia ni lon maiin chu ni dam khom nang insot pêk ki ti” ai ti pêksa a nit. Solomona chu â vâz tak a nit tâka, rammuala mi murdi nekan a vâra, Thuvâz hei sangithumka a rila, lahei khom sanglei ringaka ai siam a nit. Solomona vâz hih rammual pumpuiah an darha, Seba rengnun a lei riatin chu thûn tak ridon fia rangin a hongga, Solomona ziang a hong thlungin chu, a thu ridon murdi a lei rilfia pêk riaia. Solomona vâz zia neh archong zia hei a mit ngeiin Seba rengnun a hong mun chu arkhêl a tia. “Min an isîr hei hih chu arzâtka lua an isîr ino kêng a nit hi te” a tia. Solomona chu Pathianin vârna neh richongna a pêk sikin ai vârin a irchong a nit.

Naipanghei nangni khom ivâz nin nuamin chu, thloi loa nê pe theitu chu Pathian bang a nit.

Richang spel rang: Thuvarhei 1:7: Pumapa ði hih varna bul a nit. Nikhomsela, intohei chu vârna neh inriseina an musit a; risei nuam ngai mak e.

Ṭongridon:

1. Solomona vârna ire rangin tùm a hong?
2. Solomona hi tu naipâm ai nit?

Risei rang 20
Pumapa Tempil Moria tlanga Solomonan a sin
(1 Renghei 5:1-9;9)

Risei rang thiltum: Pumapa chu ata ranga mun an siam pekna a khan a om ngai.

Thuma: Vuansûna hin rammuala biakin sin masa taka om thurchi ei irngai rang a nit. Atun laia hin chu khotina hin biakin a om tâka, kha lai zoro a khan chu atuna a thurchi ei ringai rang tino biakin dang reng ala om ino a nit.

Riseirua: Solomona reng a hong chang kaneh chu Pumapa Pathian omna rang in isin pêk rang ai ti angka Jerusalem Moriah tlanga a omna rang in isin a phut zel tâka. Tura reng Hiran Lebanon tlanga Sidar thing itam takkan a hong tangpuia. Solomona chu a reng chang a kum ilina taka rithokin Pumapa tempil isin ai phut a nit. Kum sarika sung a sina. A mangrua khom mistri hein an lei isiam sa rong a nit tâk sakin an sin sunga hin ite iri sia, thîr isuk, thing itan iri rêng rêng iria ni make. Khante Israel mi sinithoa an imanghei kha sing ithumka an nit. Thla tin mi singkan, Lebanon tlanga biakin mangrua an hong lâka, khabana sangithumka rizathumka chungu ruaitu (Overseer) an omsa a. Hi a chungu mihei bana namdang mi neinin ipêl ngai sangsarika neh lung isuk ithiam singiriatka imang an nit sa.

Solomonan Pumapa biakin ai sin hih a dung mûk somirukka, a khang lian dân mûk sominika, arsâng dân mûk somithumka a nit. A mangrua thing neh lung hei chu en ihoi tak takka siam a nit. Rangkachak tuia inluan a nita, athatin ai roi'npui tak tak a nit. Khante Solomonan tempil hih a siam zoiin chu Pathian ziangah a lâna. Thiampu hein Pathian bom an rizona a mun rithianga an sia. Bera neh Serât chal itam takka an thata. Thiampu hei mun rithianga Pathian bom vâ sia hei an hong suak kaneh chu, Pumapa In chu sûmin a sip tâka. Khanchu Solomona neh Israel mihei khan, Pumapa Pathian chu a in ranga isiam pêk hih

a hong ilua nget tâk anit iti an riat tâk

Vuansûn tenan khom Pumapa Pathian chu a om na rang mun ei siam pêkin chu ai om ngai anit. Jerusalem tempilah bang ni loiin khodang danga Pathian Biakin ei isin hei khoma hin ai om a nit. Khabana ama iamtu murdi hei hih Pathian Biakin rithla omna in ei iniat a nit.

Richang spel rang: I Korinth 3:16: Pathian In nin iniat neh Pathian Rithla nangmaniah a om iti nin iriat ino mani?

- Tongridon:**
1. Solomonan tak itlangâm tempil ai siam?
 2. Solomona sanpu reng kha im arming?
 3. Tempil kha adung, akhang neh arsâng thlia kha idorâm ai nit?
 4. Solomona tempil siama, Pathian a om iti im riatna ai om?

Risei rang 21
Babel in risang (Genesis 11:1-9)

Risei rang thiltum: Pumapa ʔang iloia mâni khâta roi isak chu Pathian ringaiin sual anit.

Thuma: Rammuala naipang masa hei chu Kaina neh Abela an nit. Kaina chu loi itho ngai a nita, Abela chu kêl bera vâi ngai a nit. Kaina'n chu ama roisakin a thlâi chihei laia ai nuam nuam Pathian ziangah a lâna, Pathian a lungthluk make. Abela rêk chu iamnan Pathian ziangah bera ʔa ʔa thisenin ribolna a lâna, Pathian lung a hoi ok. Khaangkan vuansûn tenan khom mani roisakin ei fen chu Pathian chungah ei ithonsual rang a nit.

Riseirua: Babel in risâng: Tui sâng lian zoia khan Nova richi hei an hong pung ok tâka. Ram tinah an hong indarh tâka, khannise ʔong chu an rengkan ʔong khatka an mang ngai.

Hi miheiin an khâta roi inrifûkin Sinar ram phaizol ilianpaah In risâng tak (Babel) rivân isun rangin isin an tuma. An riming inthangna rang an zonga khanon chu rammuala hin rithek indarhin ei om loiin an tia, khanung chu in isin kha an phut tâka.

Babel riming iti omzia chu ei riat dân inlâr tak chu “**Buaina**”a nit. Babel in chu an sin zoi theinona rangin Pathianin an ʔong ân danglam pêk tâka. An ʔong hei ri rethei khâi maka, sintho thei khâi make. Hi Babel in hi mithiam ʔhenka ti dânin chu adung sei feet 295 a nita, a khang lian dân chu feet 108 a nit an ti.

Naipanghei eini khom Pathian ʔa ti ninoa, ei mani nuamlam lamin neh ʔa eiti lam lamin sin ei thon chu Pathian nuamno lam ai nit ngai a nit. Khasikin, Pathian lungkham neh Pathiana iam puma sin hih ei tho rang rong a nit.

Richang spel rang: Rom 14:23: Khanniseh, tukhomin ringla puma a fâkin chu a iam dân nino a ai tho a nit sikin Pathianin thiamno a inchang a nit. Thil ikhom iamna ninoa tho chu sual a nit.

Tongridon:

1. Babel inrisâng hi tu heiim isin rang iti?
2. Babel riming omzia imani?
3. Babel in isinna rang an tina mun hi im arming?

Risei rang 22
Ruthi Thurchi
(Ruthi 1:1-18)

Risei rang thiltum: Pathian iʔia ama iam ngit hei chu ʔatvurna an dong ngai.

Thuma: Ruthi hi Jentel nama mi Moab mi Lota richi a nit. Mirmil isava ngai a nit. Khanniselan Pathianin rammual saninringpu Jisua Krista thlâtu (inzirna richi) hei laia iʔangsa ranga a irthlang phâk hi thil rikhel tak a nit.

Riseirua: Bethlehem khua ahin Elimeleka neh a nupui Naomi hei an oma, Nai ipa inika an neia an riming chu Malona neh Kilona an nit. Bethlehem a iʔam a nat sikin Moab ram bu vângnah an rithona, zoro sotno sungin Elimeleka chu a thi tâka. Naomi chu a nai pasal inika hei neh bang an om tâka. A naihei khan an omna ram mi nupuiin an neia, an riming chu Orpi neh Ruthi an nit. Khannise nâi an nei man Malona neh Kilona hei chu an thi seng senga, Naomi hei chu an tarpi rengkan numei an nit tâk.

Naomi chu a bei adong tak taka nai ipa dang lak nei khai make. Khasikin a moihei ruai chu an pa hei in tianga fe nok rangin ati pêka. Iʔha taka ati pêk zoi nungin Orpi chu a pa hei in tiang a fe tâk. Khannise Ruthi chu a tarpi ma rang nuam thlak khai maka. A tarpi thina thi rang neh a Pathian khom itlangpui ngit rangin ʔong ân kunga, a tarpi ma khai make. Khanung chu Bethlehem tiang an tarpi ruaikan an zuang rot noka. Kha zoro kha bu ât lai a nita, Bethlehem an thlungin chu Ruthi chu mi loaia fâ nung izong a fea ama khah an tarpi ruaikan an ringna a nit.

Ruthi'n fâ nung ava zongna ngai loi ineipu hi a tarpi suapui, an richi mi Boaza loi kher a nita, ite lei ririata omno khomse lungkham takkan a lei dona, a nungkhon taka chu nupui khomin a lai nei a nit.

Ruthi pasal ithar Boaza a rithokin nai ipa an hong neia arming Obeda an saka. Obeda nai chu Jesaia a nita, Jesaia nai chu Davida a nita, Davida richi ahin Jisua Krista a zuang inzir tâk a nit.

Ruthi chu iamna det tak neh lungthlungna dik tak a nei sikin

Pathianin a ngaitua phâk ban neh a tûng phâk ban thatvurna ai pêk a nit. Pathian lung ithlunga iamna det tak inei hei chu Pathianin thatvurna a îndong nget ngai anit iti hi ane înrisei a nit.

Richang spel rang : Ruthi 2:12: Pumapa khan ni sintho tâkhei nang thung sela, Pumapa Israelhei Pathian zòkna ranga arthla nuai ni hong irbêl khan ni sin that man khah itam takkan nang peh riseh,” a ti a.

- Tongridon :**
1. Naomi pasal neh a nai ipa hei kha im an riming?
 2. Ithom Naomi hei insungkua Moab rama an irthon?
 3. A tarpi ma raka kîr noknu kha im arming?
 4. Jentel nupang nikhomse a iamna det sika, Jisua Krista thlâtu bul hong ichang kha im arming?

-33-

Risei rang 23

Daniala neh a malhei (Daniala 1:1-6:28)

Risei rang thiltum: Pathian iiam hei chu Pathianin a tangpui ngai. **Thuma:** Tianlai zoro a khan chu reng irât ual heiin arât inohei an doiha an rûn ngai. An inê theiin chu (suak) salin an thua an sin an intho ngai. Khaangkana saltâng nikhomse Pathian iiam hei chu an zokna rang neh an thatna rang Pathianin a ngaitua pêk ngai. Vuana hin sal tâng Pathian iiam tak tak Hebrai tlangval hei thurchi ei irsei rang a nit.

Riiseirua: B.C. 597 vela khan Babulon reng Nebuchadezzara (Nebukhatnezar) khan Jerusalem a hong rûna. An rengpa neh Jerusalema mi murdi salin (suak)a thui zita. Juda ram richon murdi khom a lâk pêka Babulona a pêl riai a.

Hi suaka i thua omhei laia hin Pathian iiam tak tak mi tlangval ifel 4 (ilika) an oma. An riming chu Daniala, Hananiah, Mishaela neh Azaria an nit. Khannise Babulon rengin riming ithar a bea. Daniala hi Belteshazzar atia, Hananiah hi Shadrach itin Mishaela hi Meshach a tia. Azaria hi Abednego itin ai bê tâk anit. Hi mal reng hei hi hingkan ikoi ual an nit. Danial, Shadrach, Meshach, neh Abednego itin. Hi malreng hei hi Babulon rengin varna chi tinreng risei ranga a irthlang an nita, Khasikin enkoltu rang bîk a siama, i tha takkan an enkola.

Juda nam Pathian i ti mi an nit sikin Babulon ram fâk, nêk, itui zu, sa, an pêk khomin fa ngai make. Khannisela, an taksa hei chu fâk, nêk, i tha zu neh sa fâ hei nekan an hong that uala. Khanungchu reng ziangah an thua, rengin tong a irdon murdi chu i tha takkan an sâm thei riai a. Babulon rengin Babulon ram sunga mivâr takhei, zanthla hei neh doithiam hei nêka bâk som itam takka vâ ualin a riata. Kha nia rithokin Daniala chu Babulon rama roireltu lian takkan a siam tâk.

Reng Nebukhatnezara chu reng roinpui tak a hong nit tâk sikin zoro khatka chu arlim an siama Dura phaizola an indinga, mitinin chubai i-ûn rangin thu an isua. Khannise Daniala hei mal

-34-

rengin chu chubai ûn maka, an Pathian dika chubai an ûn lema. Ama thu kha reng Nebukhatnezaran a riatin chu a ning athika, mei ðhumpuiah ipai rangin thu a pêka. Daniala hei mal reng chu mei ðhumpuiah an pai tâka. Khanise kâng make, Pathian Vantirtonin a ompuia ite na viat loiin an izok a nit.

Babulon reng an hong rithlenga reng Daria a hong inlal noka. Daniala hei mal reng chu Pathian iringa mi an nit sikin reng ditsakna an hong dong bika. Miheiin an narsa sikin Daniala thina rang an zong tâka. Reng Daria tino chu tuten Pathian dang chubai an ûn rang ni make itia thu sua rangin reng Daria an ti pêka, an ti pêk lam angkan rengin thu a sua tâka. Khannise Daniala chu nintina Jerusalem tiang a tukver i-onga a Pathian zianga tongtai mai ngai a nit sikin, keipui khura iðhul khomse Ikei in ite lei lo thei maka, idam takkan ai suak nok a nit.

Reng Daria hin Daniala Pathian hi Pathian dik tak a nit, tutên nin isir insiat rang nimake itin thu a isua tâk anit.

Naipanghei Pathian iða ama iam hei chu Pathianin ai ðangpui mai ngai a nit iti hi re mai eiti u.

Richang spel rang: Daniala 1:17: Hi tlangvâl ilikahei hi thiamna, vârna, riatna, bengvârna tinrêng Pathianin a pêk a. Khabanah khan Daniela chu inlârna neh rimang rilfia ttheina a pêk sa tâk a.

Ṭongridon:

1. Nebukhatnezara hi tak ram reng mani?
2. Ithom Daniala hei mal reng meipuah an ipaih?
3. Azariah, Babulon rimingin im an ti ngai?
4. Daniala ithom Sakeibaknei khura an iðhul?
5. Daniala ,Babulon rimingin im an iti ngai kha?

Risei rang - 24 Elija Ṭongtaina (1 Renghei 18:17-40)

Risei rang thiltum: Pathianin a mihei ðongtaina arngai pêk ngai/a sâm ngai

Thuma: Vuansûn chu risiakna thu ei irsei rang a nit. Tûm a rât ual rang? A khât banga Pumapaa ringattu manih, anit nole mi tam taka heim? A khât banga Pumapaa ringattu chu Elija a nita, Elija ðongtaina thu ei irsei rang a nit.

Tian laia khan Israel hei hin Pathian dik chubai ûn loiin mirmil pathian “Baal” an iti ngai khah chubai an ûn a. Baal hi Kanan mihei pathian a nita, fûr ruatui pathian ai nit ual tak anit. Baal pathian chubai ûn-na a khan an ruaitu Thiampu itam takka an oma, zakua’rfual an ihâka, mirmil makungah khan an iboka, an tongtai dûl dûl ngaia.

Kha laia khan Pathian dik tak chubai i-ûn ngai, mifel tak Elija a oma. Ani kha Zanthla a nit. Pathian neh ripol ngai a nita, Elija khan Israel miheiin mirmil pathian chubai an ûn ngai sikin ân khok ati ok ngaia. Pathian dik tak ibia hei niselan ai nuam tak tak a nit. “Pathian dik, tinreng itho thei hi chubai ûn rei” ati pêk ngaia. Khannise Israelhei khan, “Baal pathian hin thil a tho thei uala, amah hi chubai kin i-ûn mai rang anit. Ni Pathian chubai i-ûn hih nuam khai mang unge,” an ti pêk ngaia.

Khanchu Elija khan “Tho risiak eiti u, Baal pathian thiampu hei hong koi bûm unla, kei chu ki khâtin om ki ta, tu Pathian im sin itho thei ual fiang (en) eiti u,” a tia. Israelhei khan, “A ðat,” an tia. Khanchu Baal mirmil thiampu hei chu zakuar’fual ihâkin, an nermul ito bumkan an hong ribûm tâka. An hang tepa, an rengkan rizalika somringaka an nit, Elija makunga khan an ngir chur tâka.

Khanchu Elija khan, “A tuna hin tu pathian im rivan ata mei zuk itir thei, ei i-en rang a nit. Nin ngamim ? a ti a. Anni khan, “O kin ngam,” an ti a. Khanchu Elija khan “Tho a nit inchu serât

chal inika hong kêi rei,”a tia. Khanchu serât chal inika an hong kêia, an risem tâka. Baal thiampuhei khan an inuam tak kha an rithlanga. Serat chal kha an thata, a sa kha an richan noia, thing chungah an sia riaia. Khanchu Baal thiampuhei khan a kêngna rang mei izongin an pathian ziangah an tọngtai dûl dûl tâka. “O Baal, ne san roh itin zing ata sôn lai idenin an tọngtaia, an lâm an lâm a, mirmil pathianin ite sin a thotheino sikin mei rêng rêng zuang tum make. Elija khan, “Nin Pathian chu ai in kêng ning ati, in tằng rei, (in har rei) ikhêk rak rak rei” ati pêka. Kholoi ribol zoro dênin an tọngtai khomin, sâmnâ rêng rêng om maka, mei rêng rêng khom zuang tum ual kêi make.

Khanchu serat chal khatka Elija dongtum khom kha an thata, a sa hei kha an richan noi a, thing chungah an sia riaia. Tui bêl ilika sip, vêl ithumka maicham chungah khan an hong buaka, maicham rivêl kha tui a luang kung kung tâka, tui khan a zo chit tâk. Kha rizoiin chu Elija kha Pathian ziangah a hang tọngtaia tâka, khanchu Pumapa mei kha a zuang tum a, halrivam thillân hei, thinghei, lunghei, ipilhei khom a kêng rivâm vang tâka.

Tôm a rât ual tak ? Baal pathianim, Zanthla Elija Pathian im ?

Elija tọngtaina chu Pathianin arngai sikin an risiakna a khan Elija chu ai rât tâk a nit. Khanchu, khan taka om murdi hei khan, Pumapa Pathian chu Pathian dik tak anit iti neh Baal pathian chu pathian dik nimak iti an hong riat suak tâka. Khanchu Baal thiampu hei kha an that riai tâka. Elija Pathian chu Pathian dik tak neh tinreng isin theitu kha an hong ibiak (sava)tâk a nit.

Richang spel rang: Johana 14:13: Khante, ker minga ikhom nin ini chu nangni sin pêk mai ki ti, Pa chu Naipa sika chôiinrisanga a om theina rangin.

- Tongridon:**
1. Elija khan i Pathianim ai biak?
 2. Israel hein an Pathian nino, Pathian dang an ibiak ngai khah im arming?
 3. Risiakna ah khan tôm a rât?
 4. Itho sikim Elija kha risiaknaah khan nehna ai chang?
 5. Baal thiampu hei kha izakâm an inith?

Risei rang - 25 Rengnu Estheri Thurchi (Estheri 4:1-7;7:1-10)

Risei rang thiltum : Pathian neh a mihei rangin thatnem ringai rang a nit.

Thuma: Siami hi nupang ihâi te tak a nit a. Sônka chu a nuhei loia an fe kêrin, an inah a unai lei idonin a om a. Sôn nisa rât lai takin an in khah a hong kêng tâka. A unai kha mei laiah a oma, ai thi nget rang tâk a nita. Khanchu Siami kha mei laia khan a hei richom dum tâka, a unai kha rimot takkan ava pom a, tual tiang a hong ipom isua tâka, khangka khan a unai chu a ânzok tâk a nit. Khangka ngirin vuansôn chu rengnu Estheri thurchi ei isîr rang a nit.

Tianlaia khan Persia ramah reng roi'npui tak arming Ahasuera a om a. Nupui mel i taha tak a neia, arming chu Vasti a nit. Khannisela reng neh a milian hei makunga khan Vasti khan reng thupêk a zom nuamno sikin a rengnu nitna rithokin an in mâk tâka, Reng Ahasuera khan ân thenpui tâk. Khanchu Juda nungak mel i taha tak Estheri hi nupuiin a hong nei tâka. Estheri chu rengnu a hong nit tâk. Estheri nu neh pa hei hi an thi tâk sikin, Estheri chu a pangak Mordekaian ai enkol inlian a nit. Mordekaia chu Estheri pa angkana om a nit.

Hamana hi reng Ahasuera som a nita, a kêi inrisânga, milian (Minister) a hong nit tâk. reng thupêkin, a milian hei murdi hin Hamana i marita, a makunga rikhuk idila, i khôn ngai rangin thu a pêka. Khannisela Mordekaia khan Hamana chu Israel mi a nitno sikin chubai ûn nuam ngai maka. Ama kha Hamanan ai thei mâk ok anit. Kha phuba lâkna rangin Hamana khan Juda mi murdi that inrimang vang rang a tum tâka. Juda mihei chu an bei a dong ok tâka, rengnu pa Mordekaia khom kha beiindong takkan bora puan a sila, a lua rivut arthua, a puan a pot thlera, khopui tolaia iring tak neh ringai inse takkan a tap tâka. Rengnu Estheri khan Juda hei murdi that inrimang vang rang a nit iti thu kha la re viat maka. Sôn izaka nunga mani chu Mordekaia'n

rengnu ziangah mi a tir tâka. Hamanan Juda hei murdi that inrimang vang rang thupêk a siama, rengnu khom Juda mi a nit sikin an ithatsa rang a nit, khasikin rengnu Estheri kha reng ziangah fe selan, thupêk kha isût nok rangin ngên riseh ati a. Kha angka takin rengnu Estheri chu an va ril tâka, khannisela rengnu khan “A ne koi nonte, keima richamin reng khah ingkanim vâ son thei tâng ki ta ? itin a sâma. Khannisela, apa khan, hi zoro taka hin ni dairekin chu Juda mi murdi hi ei ithi ri ai rang a nita, “rengnu nitna ni chang hi hingka zoroa rang pial ai nit son mak chem,” itia ril rangin mi a tir noka.

Khanchu Estheri’n kha thu khah a riatin chu, “A that, hi khopui sunga Juda om murdi heiin sîn thumka neh zân thumka bu ngeiin ne tongtai pêk unla, keima neh kê som nungak hei khomin ngei sâng kin ti. Khanchu dân angkan a ne koino khoma, reng ziangah fêng ki ta, a ne lei that khoma ki thi ni zel riseh” ati tâka. Estheri chu a hai tak takna! Khanchu apa Mordekaia’n Judahei murdi a koi bûm a, rengnu Estheri thupêk angka khan sînthumba neh zânthumba sung chu bu an ngeia, an tongtai tâka.

Khanchu sînthumba neh zânthumba bu an ngei tenan chu rengnu Estheri chu a reng thluk thlaa rivon rengpa omna chontana khan ava fê taka. Reng khan lei ngo thlak make, a reng irol kha Estheri tiang a hei ileka, khanchu rengnu Estheri khan ava nâia, a reng irol mor kha a hang tona. Khanchu reng khan a ziangah, “Rengnu Esther im ai nit tâk ! im ni ne ini nuam ? ki ram rizâtka ten khom nang pêng ki ti,” a tia.

Estheri khan, “Reng that tilam a nitin chu vuan zân reng neh Hamana ranga ruai ki inrifûk, hi ifa rangin hong riseh,” a tia.

Khanchu reng khan, “A that hong kin ti atia. Hamana ril rangin rimot takkan a somhei a hei tir zel tâka. Khanchu rengnu Estheri ruai inrifûk ifa rangin an fe tâka. Rengpa khan, khangkana rengnu’n a fial sikin imani thil poimo tak ini (zong) rang ai nei nîng ati ti a iama. Khanchu bu an nêk laiin rengnu ziangah khan, “Im ne nî (zong) ni nuam ? Ni ne ini ka ngan chu nang tho pêk ki ti, a tia. Rengnu khan, “Ni milian Hamana’n,

keini Juda hei murdi that inrimang vang rang ai ti thupêk hi ne sût pêk rangin ki nuam a nit” itin a ril tâka. Kha thu khah rangin a riatin chu a ning a thik ok tâka. Kha zoro lai taka khan reng chontan vêngtu khatka arming Harbona khan, reng ringna inzoktu Mordekaia khâi thatna ranga Hamana’n ai siam mûk somringaka risâng a om iti a rila. Khanchu rengpa ning ithik khan, kha mun ngeia khan Hamana chu ikhâi that rangin thu a pêk tâka.

Juda mihei murdi thina ranga thupêk chu lei idoi rangin thu pêk isua a nit tak a. Juda hei chu izôkin an iom tâk a nit. Ama kha Estheri felna neh ihaina sik a nit. Kha zoro laia khan chu Persia renghei chu an inlalin, thu an nei tak taka. An koi nonchu an nupui hei ten khom an ziangah vâ lang iphal ni make. An thupêk ni noa, an chontana va fê khom thi theina a nit. Nikhomse, rengnu Estheri khan, thi khomse, inkhok ti loia, a mi Juda hei inzokna rangin Reng kha ava ison a nit. Khangka taka fel neh mihai a lei nit sikin a mi Judahei chu an izok tâk a nit.

Richang spel rang: Estheri 4:16: Khanunga khan, dân no angkan reng ziangah khan lût ki ti, khante, keichu ki thi le kê thi ni zel riseh,” a tia.

- Tongridon:**
1. Persia rama reng roinpui tak kha im arming?
 2. Rengpa nupui thu zomino kha im arming?
 3. Juda nungak reng Ahasuera nupui ichang tâk kha im arming?
 4. Tùm Juda mihei murdi ithat inrimang vang rang itum kha?
 5. Tùm Juda mi murdi inzoktu kha?

RISEI RANG - 26

Reng Hezakia

(Isaia 38:1-20, 2 Richisuina 32:24-33, 2 Renghei 20:1-11)

A thu tlangpui: Hezekia hih Juda reng a 12 na a nit a pa chu Ahaza a nit. Kum 25 a nitin a pa mun a lua a, Juda reng ivar tak neh reng iṭha tak hei laia khatkah a nit., A roirel nia rithokin Jehova Biak In ân rithianga, mirmil biakna thil murdi khom rithial infain a om. Hezekia riming omzia chu “**Jehova chu ki ratna a nit**”. Jerusalema tui lak intam rang dan a ngaituaa, rineng nuaia Gihon tuinarah khan tuikong a siama, Jerusalem khopui kulh sungtiang a lak lut a. Khante Assuria reng Senakeriban Judai ram irunin Jerusalem a huala., Hi zoroa hin Hezekia chu ina takkan Pathian ziangah a ṭongṭaia, khanchu Assuria sipai lomhei laiah khan ripui a leng taka, zanka tlakin mi tam takka an thi tak a.

1. Hezekia dam nona: Nikhuaka chu Hezekia hi dam inon a oma, a thi lok lok a. Zanthla Isaian reng dam ino khah a va tlo taka, ingam takkan a ziangah, “Pumapa khan ni thi nget rang a nit, khasikin ni insungmihei om rang dan rel infel roh”. ati itin a rila. Khanchu Hezekia khan Isaia hih zanthla a nit iti a lei riat tak sikin a ṭongbai suak hei khah a iam taka.

2. Pathian samna: Hezekia dam inoa zalmuna zal khah bang tiang arhêl lika, a khupa, a ṭongṭaia, Pathian ziangah khan, a thu a zom ngai tlia hei isirin a chung a lungkhamna inlang rangin a ngena, a ṭap ngui nguia, Isaia lak kha a lei suak taka, nikhomse ila vit a la phak no sikin, Pathianin a ziangah, “Kir nok inla, reng Hezekia khaha a damsung kum 15 insei nok ki ti, a ti itin va ril roh”. a ti a. Khanchu, Isaia kha a kir noka, Pathian he be khah Hezekia ziangah a va sir taka. Khante, reng Hezekia kha a hong dam nok tak sikin a lom tak taka, la hei khom a phua taka. Khanchu, Hezekia khan, “Ki damsung kum hei hih ridin detkan mang tang ki ti”. a ti a.

3. Richang spel: Lapui 116:12-13 Ki chung a sintho ṭhat murdihei sikah hin Pumapa chu im ki pek rang tak o? Saninringna kuri lang kita, Pumapa riming rilam ki ti.

4. Ṭongridon:

- 1) Hezekia khah tum a pa
- 2) Hezekia riming omzia im ai nit?
- 3) Hezekia dam ino kha tum ava tlo kha?
- 4) Pathianin Hezekia ringna khah kum izakam a insei pek kha?
- 5) Kum izakanim a pa mun ai thul?

RISEI RANG 27

Israelhei inena

(Jos.3:10,5:13-15,6:1-5,10:6-15,Heb.11:30).

A thu tlangpui: Israelhein Jordan dung an rikan zoi kaneh khan, kha ram kolvela renghei khan an lei ti tak tak a. A thenin chu Israelhei khah idoi rangin an risiama, an riakna mun Jordan dung bulah an om laiin an omna pen tetah, khua khatkaha om iti an riata. Kha khua khah **“Jeriko”** a nit, kulh idet tak ihualsunga om a nit a, kulh kotkhar ti noa chu ilût thei khom ni make.

1. Kulh kotkhar: Jeriko khuaa mihei khomin Israelhei thurchi khah an lei riatin chu an lei ti ok a. Khasikin, kulh kotkharhei khah an ikal khapa, a san chu kha rama mihein Israelhei khah iti khom an tia, i-en khom en nuam mak a. Khannise, Israelhein kha ram khah Pathianin an omna rang piala a lei ipek a nit sikin iom an tum ngit tak a. Kha thu sikah khan ridoi ai tul tak a nit. Khasikin Pathianin ruaitu **Josua** khah mirat khokhengin ai siam a nit. Israel iti omzia mun thenah chu **“Pathian Reng Nai”** iti a nit a. Ilet itharah chu **“Pathianin sunghual riseh”** iti a nit.

2. Pathian inlarna: Nikhuaka chu Josua ziangah Pathian a zuang inlara, “Enta, Jeriko kulh neh an reng neh mirat inthanghei hih ni kutah nang ki pek tak” a ti a. Khante, Pathianin Josua ziangah a tho rang dan ifel takkan a ril tak a. Jeriko kulh khah sunrukka sungin nin tin voikah nin vel sua rang a nit. Ipa ral idoi thei murdi tang riain ta, a sun sarinin chu voi sarikah vel nin ta, thiampuhein Pathian thuthlung bom rizonin, bera riki totorot an tum rang a nit. Khanchu riabuka mipuihei khan rol iring takkan huaizam an tho rang a nit itin a ril vanga. Josuan itha takkan ar ngaia, khanchu mipuihei khah a ril tak a.

3. Pathian thuzom hih nena a nit: Pathianin Josua a ril lam takkan mipuihei khan sin an thoa, ipa ral idoi thei tak murdihei khan Jeriko kulpui khah an hual tak a. A sun sarinin chu zinga rithokin voi sarikah an vela, thiampuhein Pathian thuthlung bom rizonin totorot an tum inri dur dur tak a. Kha zoin chu Josuan mipuihei ziangah, “Ipa ta rei, Pumapan khopui hih nangni a pek tak” a ti a.

Khanchu, Jrikoa kulpui khah a zuang chim rum rum tak a. Israelhei kha a sungah an luta nena an chang tak.

4. Ire rang poimo:

1. Jeriko hi rammuala khua lui tak khatkaha a nit. B.C.5000 vel ata miriam lei omna mun a nit. Josua loma Jordan an kai zoia ram an ilak masatak a nit.

2. Jerikoa hin Jisuan Bartimaia an dam (Mk.10:46-52)

3. Jerikoa hin Zakaia khomin Jisua a tong (LK.19:1-10)

4. Josua hih a pa chu Nuna, Efraim richi, ruaitu Mosia thultu a nit.

5. Josua hih Pathian iti mi, nungkir tho ngai ino, ruaitu iamom tak a nit.

6. Josua ti omzia chu-Jehova chu Sariningna tina a nit.

7. Ruaitu chu mi iamom a nit rang a nit.

5. Richang Spel: Heb.11:30. Iamnan Jeriko kulpui khah Israelhein sun sarikah an vel zoin chu a chim tak.

6. Tongridon:

1. Isarelhein vadung an irkan khah im arming?

2. Pathianin Kanaan ram hih tu hei lua ranga a lei inkung mani?

3. Jeriko kulpui khah voi izaka an vel inim ai chim khah?

4. Pathian thuthlung bom rizonhei khah tu heim an init?

5. Josua ti hih im a omzia?

6. Israel iti omzia im ai nit?

RISEI RANG - 28
Thiampu Elia neh a naihei
(1 Samuela 2:12-36)

A thu tlangpui: Silo khuaa hin roireltu neh thiampu laltak khatkah a oma, arming chu Elia a nit. Arming omzia chu **“Choinrisang”** itina a nit. Nai inikah a neia, khahei khah Hopnia neh Finehasa an nit. Thiampu Elia hih mi tha tak neh roireltu rat ino tak khom a nit. Khante, Israel mi murdi ribol rangin a ziangah an fe ngai. Hi zoroa hin thiampu Elia naihei chu Silo khuaa a khan thiampua rimangsa ngaihei thonsualna sikin thiampu Elia chu Pathianin ai ngo a nit.

1. Ribolna ringaiin nepin a om: Thiampu Elia naihei Hopnia neh Finehasa hih an isual tak taka, Silo khuaa ribolna sa hei khah an idu du, dan no takin an laka, thir kutzum an choia, an idu du an sun ikhela, ribolna muna nuhei ziangah khan “Nin ne pek nuam no le khom ikhel kin ta, kin ilak rang a nit” an ti a. Kha bang khom ni loin, risonna puan in kotkhar bula nupanghei khah an lei chaipui ngaia. Kha thu thang thano tak kha an pa'n a lei riata, an ziangah,, naihei ithom hingkana thil thano nin itho tak hi!. Mi khatkan midang chungah a سوالin chu Pathianin a hoih theia, khannise, Pumapa chungah سوال isin hei hih tu takinim ihoi tang ata? a ti a. Khador an pa khan an chung inkhok zia a sir pek nung khomin an pa thu khah ite be'n be maka. Hi hei sikah hin mihein Pumapa zianga ribolna kha an ringai innep tak a.

2. Pathian ningthik a tlung: Pathianin thiampu Elia ziangah, ki zianga ribolnahei chanlamboi nin inchang tak sikin atuna rithokin chu ni insungmi tukhom tar kun idena ring om khai no tin u. NI insungan zir murdika ngan chu an vanglai ngatin thing an ti. Khante, ni nai ipa Hopnia neh Finehasa chung thil itlung rang hih nita rangin risin ning ata, sunka sungin an ruakan thi seng seng an ti, a ti a. Khante, Israel neh Farisaihei an risoia, kha zoroa khan Hopnia neh Finehasa chu an ruakan ralbualah khan an thi seng seng tak a. Thiampu Elia khan a naihei thurchi a riatin chu a lira, a ringru a khiaka, a thi tak.

3. Insungkua fel ino: Pathian dan iza nona sikin thiampu Elia insungkuahei chungah vanduaina inrît tak a tlung tak a. Pa thu ringai ino nai neh insungkua fel ino chu Pathian ningthik inrît tak tlungna mun a nit ngai. Thiampu Elia insungkua chu natinsat takkan a chim taka, an ding nok rang tute om khai make. Atunlai iamtuhei insungkua khomah naihei thuzom nona sikin Kristian insungkua chim itam takka imu thein ai om a nit.

4. Richang spel: Lapui 36:1 سوالin misia lungريلah thu a sira, a melah Pathian tina zel omake.

5. Tongridon:

- 1) Thiampu Elia khah tak muna thiampu mani?
- 2) Elia riming omzia khah im ai nit?
- 3) Thiampu Elia naihei khah im an riming?
- 4) Tu insungkuahei chungam Pathian ningthik ai tlung khah?
- 5) Ralbuala thi hei khah tuhei mani?

Risei rang - 29
Mosia Thurchi
(Fesuak 2:1-10)

Risei rang thiltum: Suala hoi inhâia om nekan chu Pathian iṭi mihei neh denginthei ituang a ṭhat ual.

Iamnan Mosia khah, a hong lian tenan chu Faroa nainu naipa a ribe mai kha nuam khâi maka, Itoi teka sunga sual hoina mang nêkan chu Pathian mihei neh dengtheina tuang arthlang lem tâk.

Izip a khan Josefa damsungka chu Israel mihei kha ihoi takkan an oma. Khannisela Josefa thi nungin reng ithar, Josefa thurchi re viat ino a hong inlal tâka. Reng ithar khan, a mihei ziangah, “Israel richi hei an hong tam ok tâk sik neh an rât sikin iṭi an iom anit tâk. Nakana ridoihna a omin chu ei irâl hei tiang kop lik anta, hi ram ata hi an rot duai loiin,” a tia. Khanchu sin intak tak hei an in sin a lungkhamna boi viat kan ro lung hei an in siama deng ithei tak takkan sin an intho a.

Khanchu Izip reng khan, Hebrai mi, nai in nei ngai hei a sona. An riming chu Sipraii neh Puaii an nit. An ziangah, “Hebrai nupang hei, nai inei ranga nin ṭangpuiin ipa a nitin chu that zel ngai rei, nupang a nitin chu a ringna zua pêk ngai rei dua” ati pêka.

Nikhomsela, hi mi nai innei ngai hei hih Pathian iṭi mi an nit sikin Izip reng thupêk kha zom nuam maka, nai ipahei ringna kha an zua ngaia.

Izip reng khan a koi a, an ziangah, “itho rang sikim naiipa ringna nin izua ngai ? ati pêka. Kha mi nai inei ngai hei khan, “Hebrai nupanghei chu mi risel tak an nita, Izip nupanghei angkan ni make, khasikin kin thlung man nai an lei inei tâk ngai a nit” itin an sâm a.

Kha zoro lai taka khan, Levia richia mi khatkan a chipui ngir nupuiin a neia, naiipa mel iṭha tak a nei a. Anu khan thla thumka a thupa, a thup sôt thei khaino sikin, vadung kola lailuang kha rikuangin a siama, tui a lût theino na rangin alkatara a nâl a. Khanchu kha rikuang sungah khan naite kha ân zâla, loisûl karah

Nile vadung pangah khan a sia tâka. A farnu Miriami khan sũntin, “Im a chang, im a chungah thil a thlung ? itin ila ianka ta dingin ai en thlât ngai a nit. Sũnka ta chu reng nainu kha tui risil rangin vadunga khan a zu fê tâka, a som nungak hei neh vakola an lon vêl a. Vadunga loisûl karah rikuang kha a mu kaneh chu a som nungaknu kha va la rangin a tir a. Reng nainu khan rikuang kha a zuk i-ong inchu nâi ipate kha a mu tâka. Khanchu naite kha a hang ṭap tâka, “amah hi Hebrai naihei laia khatka a nit ngêt hih,” a ti a. Khanchu a farnu Miriami khan reng nainu ziangah khan, “feng ki ta Hebrai nupang hei laia khatka nang idon pêk rang nang la va koi pêk rong” atia. Khanchu reng nainu khan, “A ṭhat fe roh, a ti pêka. Khante, Miriami kha a thlan vang vanga, kha naite nu kha ava koi pêk tâka. Reng nainu khan, hi naite hi ṭhùi inla, ne don pêk roh, khanchu lo nang pêng ki ti, ati pêka. Khante naite kha a lâka, a donsui tâka. A hong thura, a hong lian ual tenan chu Faroa nainu ziangah a hong ṭhũa, a nâi a hong inchang tâka. Reng nainu khan, “Tui ata ki lâk suak a nit” itin arminga khan Mosia a sak tâk.

Mosia kha a hong puithlingin chu a suapui Hebrai mihei hi idoram sin intak an isin i-en rangin ava fe a. Khante, Izip mi khatka hin a suapui Hebrai mi a tok lâi ava mua, a ngat zuaia, tute omak iti a riatin chu Izip mi kha a tok thata, bali nola a thup tâka.

A tûk noka ava fe nok inchu Hebrai mi inika risual ava mua, khanchu Mosia khan, â thon châipu ziangah khan, “itho sika ni Hebrai suapui ni itok im? itin ardona. Ani khan, “Tûm ki chungu thu neitu neh roireltua nang iphun ? Izip mi ni that angkana ne that ni tum mani ?” ati a. Kha thu kha Mosian a riatin chu a ṭi tâka, ki sintho hi mi’ n an iriat tâk kêng anit hi te, itin a ngaitua, khanchu Faroa khan kha thu kha a riatin chu Mosia kha i-that rang a tum tâka. Mosia chu Faroa ziang ata laizâm ithon Midian rama om rangin ai rot tâk a nit.

Khante kha rama khan Jethroa nainu Zipori kha nupuiin a neia, a tarpu Jethroa Midian thiampu kel neh bera hei kha a

enkol tâka. Khante, nikhua khatka ta chu ram ichâr fe thlengin a kêl neh bera hei neh Horeb tlang an hang thlunga, kha muna khan Pumapa Vantirton, mei chokin sùlribuka a zuang inlâr a. Sùlribuk kha a kânga, khannise kâng zoi maka, Mosia khan sùlribuk kâng zoiino kha a mun chu arkhel ati oka, “ithom sùlribuk a kâng zoino, arkhel bâka” itin a ena, a kîr nok tâka. Khante, sùlribuka rithokin Pathianin Mosia chu a sam tâka, “Mosi, Mosi” itin. Khante Mosia khan, “hin ki om,” itin a sâm a. Khanchu Mosia ziangah Pathianin, “Ki mi Israelhei kha Izip ramah deng intheiin, an tuang natinsat rei sikin an ikhek iri ki riata, khasikin ki mihei hi Kanan ram, dût tui luangna neh khuaitui luangna ramah iṭhui suak rangin nang ki tir a nit” itin Mosia kha ai koi tâk a nit.

Mosia khan rengnu naipa ichanga, reng ina ihoi takka om nekan chu a mi Israelhei ziangah dengtheina tuang arthlang ual tâka. **Richang spel rang :** Fesuak 2: 10: Naite khah a hong lian tenan chu Faroa nainu ziangah a ṭhui a, ani khan a naipan a lei nei tâk a, “Tua rithoka kî lâk suak a nit a,” itin arming Mosia a sak a.

Ṭongridon:

1. Hebrai mi nai innei ngai kha izakâm an init? I- im an riming ?
2. Mosia riming omzia im ai nit ?
3. Tak munâm Pathian Vantirton kha Mosia ziangah a inlâr ? Mosia khan im ai mu ?
4. Mosia hin reng nainu naipa ichanga, reng ina ihoi taka om nekan im a irthlang ual kha ?

Risei rang - 30 Izip rama Israelhei (Fesuak 3:7-22)

Risei rang thiltum: Pathianin Izip rama a mihei dengthei tuang thlia ai riat angkan, naipanghei intakna neh dengtheina khom a riata, tangpui ai nuam ngai a nit.

Josefa thi zoi nungin Israelmi hei chu reng itharin deng ân thei zia ei hong riat tâka. Khasikin Mosia kha a ṭhuisua rangin Pathianin ai koi anit iti khom ei hong irsei tâk a nit.

Israel mihei kha Josefa damlaia khan chu ihoi takkan Gosen ramah khan an bera hei i-enkolin an lei khosak ngaia. Khannise an hong punga, an hong tam ok tâka, irât khom an rât ok tâk sikin reng ithar khan deng intheiin ân tuang tâka. Pathianin an tuang natinsat zia a riata, Izip ram ata iṭhuisua a nuam tâk sikin Mosia kha ruaitu rangin ai koi suak tâk a nit. Mosia kha Pathianin sin rikhêl sintheina ritha a pêka, bera enkol ngai a nit sikin irol a choi ngaia. Khanchu Pathianin a kuta rol kha in mangin Mosian sin rikhêl itam takka ai sin thei tâk a nit.

Mosia khan Pathian ziangah, “Kei chu dang rinâl mi ni manga, ṭong ithlâi neh ṭong ri-ak kêng ki nita,” a ti a. Khannise Pumapa khan, “Tûm miriam hei hi bâi innei, tûm kuar isêt, a nit nole bâi iboia siam ? Tûm mu theina pe, anit nole mitichoa siam? Pumapa keima ni mang ima? khasikin ni ṭongna kipa nang tangpui kita, ni ta rang khom nang in riang ki ti,” ati pêka.

Khanchu sin rikhêl itam takka Mosia mangin Israel hei ṭhuisuana rangin Pathianin sin ai tho tâk a nit. Mosia neh a suapuipa Arona khan Faroa ziangah, “Israelhei kha ramcharah sûnthumka lampuia Pathian ziangah ribolna lân rangin isua roh,” an ti pêka. Nikhomse reng khan phal maka, Israelhei kha deng ân thei ual ual tâka. Khasikin Israelhei Pathian chu Pathian irât tak, tinreng isin thei a nit iti Faroa khan a riatna rangin Mosian a rol kha irûl ân changa, Izip rama mivâr neh mitvaih doi ithiam murdi khan an irol irûl an in changa, nikhomse, Mosia rol irûl ichang khan an rengkan a lem ri ai tâka, nikhomse Faroa khan

Israelhei kha isua nuam make. A thar vangin Nile vadunga tui kha Mosian a rolin arvêl (atok) a Nile vadung tui kha thisen a chang ria tâka. Tui i-in rang nei khâi maka, Izip ram sung murdia tui chu thisen a chang vang tâka. Kha ten khoma khan Faroa lung chu a khir mai sikin Israel meihei kha la sua nuam thlak make. Mosia chu Faroa zianga afe ikipa lei isua pêk nuam ngai maka.

Izip ramah uțok hei, țhangțham hei, ithoihei ân tâm peka, insung sa hei chungah rî ân lênga, mitin neh satin chungah sakhuai ripui ân lênga, Irial khom miriam neh sa neh chimû chungah a thlaka, a siat chita. Ikhâi ân tâma, chimu tin an fâk zoia, sunthumka sêng Izip ram murdi ah izîng richel chitin a tuama, khangka dor Izip hei chungah dengtheina a thlung tâk khomin Faroa khan Israel mihei chu la sua nuam thlak maka, khasikin a nungkhon taka chu nâi lutîr thina a hong ithlung tâk a nit.

Pathianin Mosia ziangah, “Israel hei murdi chu an inkot chung chita thisen inot rise,” a ti pêka. Khante, zân lâi taka chu Vantirton a zuanga, thisen om nona kipah ilûtin, Faroa nâi lutîr ata boinu nâi idênin ai that pêk riai tâk anit Ițap, ikhêkin an irung vung tâk. Khanchu Faroa khan Mosia neh Arona a koia, irang takka suak rangin he a bê tâka. Israel hei chu nupang neh naipang tep iloiin mi nuai irukka (6,00,000) an nit. An Ui, Ar neh an rengkan an suak riai tâk.

Pathianin Izip rama a mi Israelhei intakna neh dengtheina murdi a riat lenga, an mani sanisua rangin lampui ai siam pêk angkan naipanghei intakna neh dengtheina murdi khom ai riat pêkin, ițangpui rangin lampui ai siam pêk ngai anit iti hi ei iam ngit rang a nit.

Richang spel rang: Fesuak 3:7: Pumapa khan, “Aigupta rama om ki mihei tuang natinsatzia kî mu mai a nit; anmani sininthotuhei sika an ikhêk irî khom ki lei riat a.

Țongridon:

1. Izip reng kha im an ti ngai?
2. Izip rama Israel suaka omhei sanisua rangin Pathianin tûm ai tir?
3. Israelhei khah ingkanim an isuak thei tâk?
4. Israel mihei kha nupang neh naipang tep iloiin mi izâkam a suak an inith kha?

Risei rang 31

Tuipuisen rikan thu (Fesuak 14-16:1-21)

Risei rang thiltum: Pathianin a mihei an irâlhei a rithoka ai san isua angkan Pathianin naipanghei lung a thlungin ai donsui ngai a nit.

Israelhei murdi chu an ran rual murdihei iṭhuiin, Izip ram chu an mâk tâka. An fâk rang ibai hei, silbom hei ichoiin ram ila taka fe rangin an isuak tâk a nit. Isot takka an fê nungin Tuipui sen an thlung tâka Tuipui sen chu (Red sea) Phâiruang tuipui tina a nita, vadung kola phairuang (reed) itam takka a om sikin. Mosia neh lompuai itam takka hei khan puan-in isinin tuipui sen kola khan an ringam tâka. Khangkana an ringam laia khan, mi khatka hin, “Uai ringai ta u, iri natinsat tak ki riat” a hei tia. An rengkan iri kha an hei ringaia, thlipui iri lak ni maka, rivân rikhong lak ni maka, îm ai nit rang tâk? itin an buai zap tâk. Iṭha takkan an ringaiin chu Sakor ithlân iri neh Tali thlân iri a lei nita. Mi khatka hin, “Uai, Faroa sipai hei an nit tâk hi te, an ne hong irzûl tâk kêng anit hi te” a hang tia. Khanchu lompuai hei murdi kha iṭi neh rilonthingin an om zoi tâka.

Mosia rêkin chu, “Ṭi no rei, nin ning inbei riam rei, Pathian ei tiang ai ṭang a nit. Vuansûna Faroa neh a sipaihei nin imu hi kumkhuan mu nok khâino tin u,” itin thlangam a sak a.

Khanchu Pathianin Mosia ziangah khan, “Lompuai murdi hei khah matiang ipan a fê nok rangin iril inla, khanchu nê rol khah lêng inla, ni kut kha tuipui chungah phar roh,” ati pêka. Khaangka khan Mosia khan a kut a pharin chu Pumapa khan khosak ithli rât tak a hong in râng, tuipui khah a sêm ikhîra, arṭhen tâka, tuipui neh tuipui kara rinêng ichâr ah Israel naihei kha an fea, varâl an kâi tâka.

Faroa neh a sipaihei khom tuipui tiang an zuang tâka. Anni khom Israelhei lonna tuipui rinêng ichâr ah an hong. Tuipui sungah an om laiin Pumapa khan Mosia ziangah, “Nê rol khah tuipui chungah lêng nok roh,” ati pêk a. Khanchu Mosia khan, a rol tuipui chungah a lêng nokin chu tuipui sen chu matona a

luang ngai lam takkan a hong luang noka, Faroa sipai hei murdi chu tuipui sen a khan tuiin a chîm inrimang vanga, an thi riai tâk. Khanchu Israel mipui hei khan Pathian sintho rikhêl an mua, Pumapa kha an ṭia, Pumapa neh a suak Mosia kha an iam tâka. Mosia neh Israel mipuihei khan Pumapa inpak nan la an sak dûl dûl tâka.

Richang spel rang: Lapui 105:1-2: O Pumpa ziangah lômthru ril unla, Arming chu rilam rei; mi tin lâiah khan a sinthohei chu ril rei. Amah chôiinrisangin lâ sâk unla, amah inpâkin zâi rei; a sinrikhêl sin murdi thu chu ril rei.

Ṭong ridon: 1. Tuipui sen hi itina mani ?

2. Israelhei khan tuipui sen khah ingkanim an irkan kha?
3. Faroa neh a sipaihei murdi khah tuipui sen a khan ingkanim an om tâk?
4. Israelhei khan tuipui sen an rikan zoiin im an itho tâk?

Risei rang 32

Ruaitu sumpui

(Fesuak 13:21-22, Ritepna 9:15-23; 10:11,34)

Risei rang thiltum: Pathianin a mihei sūnah sūmin, zāna meiin a iruai angkan naipangte hei khom sūn neh zānah lung ithlungin ai donsui mai ngai a nit.

Israelhei chu tuipui sen an rikan zoiin chu an la fê na ngaino mun ramchārah an inzin tâka. Kha zoroa ruaitu rangin Pathianin sūm neh mei imangin a iruai a nit.

Hapta masa a khan Mosia neh Israelhei chu tuipui sen an rikan thu ei riseia, vuani chu ramkarah, ram icharah an inzin thu ei irsei nok rang a nit.

Zîngka chu totorot iri naipang khatkan a hang riatin chu, “Takâm ki om tâk, totorot iri ki riat hi, irang sika mani ? atia. Khanchu naipangpa khan, a urenghei, a suapui dang dang hei, api, apuhei neh ram ila taka fê rang an nit iti a rila, a hong riat tâka. Hi totorot iri hi chu bunekna rang, puansil, puantha zuatna ranga itum a nita. Khanchu naipangte kha tual ava suakin chu an riabuk chungah khan sūmphâi ivâr luai hi a lei rizâm chûm a. Naipangte pa khan a ziangah, “zîng bu ne zoiin la ei sial, Ui-Ar hei va zong roh. Sūmphâi fena tiang tiang hi ei fe nokna rang anit. Pathianin hi sūmpuia hin a ne iṭhui a nit, rimot takkan ni zîng bu ibai kha fa zoi ta roh,” ati pêka.

Naipangte khan a zîng bu a nêk zoiin chu an sial-Ui-Ar murdi a bûm khoma. Apa khan an puan murdi a zuata, a nu neh a suapui dang hei khan bubêl-anbêl neh thil dang murdi an rikhoma, an puak murdi an siam zoiin chu an suak nok tâk a.

Naipangte khan, apa ziangah, “Epa tikinim dût neh khuaitui luangna ram iṭha khah ei ithlung rang ?” itin ardon a.

Khannise apa khan re ual bik make, khanchu an fê, an fê a, sūn nithlâkin an lon ngat ngat a, kholoi a hong nit inchu sūmpui kha arngam tâka. Kha sūmpui khah arngam tenan chu kha munah khan ichâm mai rang tina a nit. Zāna chu sūm kha mu thei khai

maka, meipui khah izingah ai om ngai tâk a nit.

Naipangte khan a zâl pumin, “Pathianin chu lung a ne thlung vangna ! Pathianin ram ithara nangni ṭhui inlût ki ti itin ṭong ân kunga, atun ahin lampuiaah sūm in a ne ruaia, ei fêna rang a nê ril thiai a,” a tia. Kha munah khan isot ianka an châm a.

Khannise zân khatka ta chu, zân laiah ala zîng lai tak neh a lan thim lai takin totorot iri a hong om thut tâka. Kha naipang khan, “Im ai nit nok tâk?” a tia. Apa khan, “meipui khah arthon tâka, Pathianin ifê suak nok rang ai ti tâk a nit,” itin a sâm a. Mi murdi hei kha an risiama zânril laiah khan lompuai hei khah an isuak nok tâk a nit. Meipui khan an fêna rang lampui khah a el invâr thiai a, ivâr nuaia khan an fê tâk a.

Naipangte pa khan , “Pathianin chu lung a ne thlung bâk bâk reng, ram iṭha, roiinpui taka nen om rang hi ai tum a nit hi te, kha rama fê rang kha Pumapan a nê ril a, zânlai takah khom ei fêna rang nê riltu rangin meipui ivâr tak hi a nê pêksa ah,” itin a ngaitua tâk

Richang spel rang: Lapui 105:2: Amah chôiinrisângin lâ sak unla, Amah inpâkin zâi rei; A sinrikhêl sin murdi thu chu ril rei.

Ṭongridon: 1. Israel mihei khah Pathianin ramcharah khan ingkanim a iruai ?

Risei rang 33
Rivana rithoka Manna
(Fesuak 16:2-35; Johana 6:1-15)

Risei rang thiltum: Pathian thatvur ei dong sikin a ziangah lomthu ei isîr rang a nit. Israel mihei chu Pathianin ramchara khan sîna sîmin zâna meiin a thui thiai mai a. Tuipui sen a rithokin Sîr ramchara an lût a, kha zoiin Mara mun an thlung a. Mara muna rithokin Elim iti mun an hong thlunga. Kha munah khan tuinâr somleiinika neh itûm kung somsarika a om a, tui kolah khan riabuk an khuar tâka. Khanchu Elim ata an suaka Sin ramchar an hong thlunga, ama kha Elim neh Sinai kara om a nit. Kha zoro kha Izip ata an suaka rithokin a thla nikna, a sîn somleiringana ni a nit. Kha ramcharah khan Israelhei murdi khan Mosia neh a suapuipa Arona ziangah an hong, “Kin nupuihei, kin nâiheih neh kin von aţam a ramcharah ite ifa rang lak omaka an hong tia. A thenin, “Ithom Izip ramah ei om ngitno kha ! sin iţha takkan ei tho a, bukhom ei khop tok ka ei imu ni makima ? an tia. A thenin, “Mosian ramcharah von iţama thi ranga a ne hong iţhui a nit hi te !” itin an riphun a.

Khanchu Mosia chu lomtui hei fâk rang izongin Pathian ziangah a tongţaia. Khanchu Pumapa khan Mosia tongţaina a hong sâma, Mosia neh Arona khan Israel mipui hei kha an koibûma, an hong ribûm zoiin chu, an ziangah, kholoi tiang chu Izip ram ata nangni thui suaktu chu Pumapa a nit ngêt iti re tâng nin ti. Zîng a khom Pumapa roiinpuina mûng nin ti, a chung a nin riphunna a lei riat tâk sikin. Keimani hi îm kin nita, kin chung a nin irphun nimaka, Pumapa chung a riphun kêng nin in it. Khasikin kholoi tiang ifa rang sa Pumapan nangni pêng ata, zîng tiang chu ibai nin nuam dorka fa rang nangni pê sâng ati, an ti a.

Lompui hei khah an ri-ena, “Ingkam a nit thei ranga ? Mosia neh Arona thusîr hi im a omzia ?” an riti risaka. Khannisela kholoi a hong nitin chu, an riabuk idâpin vahmim an hong vuanga, an mana, an thata, an fâk tâka, an khop khopka sa an ifâk tâk a nit.

Atûka chu an riabuk vêlah khan rido arthua sup a, rido kha a hûl tenan chu ramchar ipil chung a khan thil ân pête te, ivûr lom tiak tiakte hi a lang fur a. Israelhei khan an mun chu, “Im ai nit rang tâk ? an tia. Mosia khan an ziangah, “Pumapan nin fâk rang ibai nangni ai pêk a nit hi. Pumapan mitinin nin khop dor seng rût rei, mi khatka rang Omer khatka (Omer khatka chu liter 2 ka a nit). Mitinin puan in sung a om murdi hei rang nin rût rang a nit, itia thu ai pêk chu a nit,” a tia.

Khanchu kha bai riming kha “Manna” (Manna chu imani tina a nit.) itin an be tâka.

Koriander (theiru) angkana vâr sap neh ibai khuaitui neh a siam angkana thlum a nit. Khanchu Pumapa khan, sa neh ibai an khop dor dorkan ai pêk a nit. Khanchu Pumapa khan, Mosia ziangah, “Bêl lan la, Omer sipka Manna chu se roh, mi tukhomin an mu ikipah ramchara khan iţha takkan nangni enkolin nangni ki ifân khop a nit iti riang an ti,” a tia. Khanchu Mosia khan, Pumapa tilam takkan a tho tâka.

Richang spel rang: Johana 6:35: Jisuan an ziangah, “Keimah hih ringna bai chu ki nit. Tukhom ki zianga hong kangân chu an vonţam no nia; tukhom keima ne iam chu an tuirihâl khâi no nih.

- Tongridon:**
1. Manna hi iti na mani?
 2. Ramcharah khan Israel hei kha ingkanim Pumapa khan a ifa?
 3. Pumapa khan, Mosia ziangah irang sikim Manna kha Omer sipka bêl sungah se roh, ai ti pêk?

Risei rang - 34
Jisua suak Thurchi
(Matthaia 1:22-25)

Risei rang thiltum: Rithiangna hin Pathian a inlang ngai a nit.

Thuma: Rithiangna bang hi Pathianin thu bula ai sia a nit. Rithiangna ti non chu tutên Pathian mu theino nih iti a nit. Rammual pumpuia Baibil ah rithiang itia chuang chu nungak Mari hi nungak rithiang itia koi a nit. Hi nungak Mari a rithoka hin a nit Jisua a inzir tâk. Vuani chu hi nungak rithianga rithoka Jisuan zâr dân hi ei irsei rang a nit.

Risei rua: Tianlaia khan Zanthlan a lei rila, Nungak rithiang inrâi ata naipa nei ata, arming Jisua sak an ti iti thurchi hi Zanthla hei lekhabua a lei inpuang thlâm tâk a nit.

Hi zoro hi a hong thlungin chu Nazareth khua nungak khatka a oma arming Mari an tia, kha nungak khah (Mistri) thing isin ngai tlangval Josefa nupui hual a nit. Zoro ka chu Mari ziangah Pumapa Vantirton a zuang inlâra, hinka hin ati pêka, “Mari òino roh, nâi ni vong rang a nit. Ni nâi vong hi Rithla Rithianga rithok kêng ai nit. Naipa nei ni ta arming Jisua ni sak rang a nit. Zanthlan nungak rithiang khatka inrâi ata, ai ti khah Mari chungah a hong tlung tâk sikin Mari chu nungak rithiang itia koi a hong nit tâk.

Mari thlîng ino a nit sikin a pasal rangpu Josefa kha a lungdûk ân tonga. Khannise Vantirtonin armangin a ril sikin Josefa chu òi loiin Mari chu nupuiin a nei tâk

Mari nâi nei zoro a hong thlunga khan reng Kaisaran Rom ram op murdi riming riziak rangin an manih khua chita fê rangin thu a sua. Mari neh Josefa khom Davida richi an nit sikin Bethlehem a riming riziak rangin an fea. Bethlehem an thlungin chu Mari nâi nei zoro a thlung tâka. Mikhual an tam a khual thlung inah mun an mu khâino sikin, serat in an rithiala ama khan an oma. Kha zoro a khan Mari chu naiipa a neia. Serat inah khan zâlmun khom a omno sikin naite chu safâk zongna ngai

sakhênga khan ân zâl tâk. Kha naisen kha Pumapa Jisua chu a nit.

Richang spel rang: Matthaia 1:24-25: Khanchu Josefa khah a thoi a, Pumapa vântirtônin a ti pêk lam angka Mari khah a nei tâk a. Khanniseh, a nai vong khah a nei mâkah chu pôl mak e. Khante, Josefa khan arming chu Jisua a sak tâk a.

Tongridon:

1. Nungak rithiang kha im arming ?
2. Josefa hin tûm nupuia ai hual neh tak khomim ai nit ?
3. Jisua a suak laiin takam an inzâl ?
4. Kaisara hi tak ram reng mani ?

Risei rang 35
Samari Miṭha Thurchi
(Luka 10:25-37)

Risei rang thiltum: Mi murdi chung a sin iṭha sin rang a nit.

Dân inriseipu khatka hin Jisua rinak rangin a ziangah a hong a, “Minrieipu kumkhua ringna neina rangin im ki sin rang ? itin ardon a. Jisuan Pathian Thubûn im ai ti ? Ingka nim ni tep ngai ? itin a sâma.

Ani khan, “Pumapa ni Pathian chu ne lung murdin, ni ringna murdin, ni râtna murdin, ni lungril murdin lungthlung roh. Nangmah lung ni irthlung angkan ni bunga hei lungthlung roh ati “itin a sâma. Jisuan a ziangah, “Ni sâm indik, khangka takin sin inla, khanchu ring ni ti,” ati pêka.

Khannisela dân inriseipu khan thiam ichang a nuama, Jisua ziangah, “Tûm ki bungahei ? itin ardon noka. Kha tongridon sâma rangin Jisuan hi tong rikhek thu hi a isîr tâk a nit. Khasikin hi tong rikheka rithoka hin iamtu heiin chu eimani lung ei irthlung angkana midang hei lung ei ithlunga, ei iṭangpui rang hi Pumapan ei bunga hei a ne iti pêk anit iti thu hi ei zuang iriat thei rang a nit.

Mi khatka hi Jerusalema rithokin Jeriko khuah azu fe a. Ama hi Jerusalema om a nit sakin Juda mi ni ngêt a ti. Lampuiah misual, suam mi hei, mi sum neh puan ila pêka, mi tobit ngai hei kha a tong tâk a. Kha misual hei khan Juda mi, khaul inzinpa kha a silbom hei an khek pêka, a sum nei murdi khom an lâk pêk vanga, an itok bita, ithi lok lokkan lampuiah khan an imâk rak tâk a nit. Ani khah châng khom châng thei khâi iloiin neh lon khom lon thei khâi iloiin, thisen ikâi dêi duaikan ai om tâk a nit.

Khanchu kha lampuia khan, thiampu khatka a zu fea, a mun chu lamdang tiang a phial tâka, a thar vangin kha lampu ngira khan Levi mi a zuanga noka, khâmpa kha a hei mu nokin chu ani khom lam sîr tiang ai pial nok tâk a nit. Hi thiampu neh Levi mihei hi suam mi tongpu neh hin namka an nit a, khannisela an suapuipa, an panampa hi lung inkhamin ṭangpui nuam iloiin an imâk rak tâk a nit.

Khannisela, Samari mi tumani khâ lampu ngira khan a hong a, suam mi tongpu kha a mu tâka. Juda neh Samari mihei chu nam dang dang an nita, Juda hei vângin chu Samari mihei hi an musit tak tak ngaia. Hi Samari mi hih Jerusalema om ngai nino se arhoia, khannisela kha suam mi itoka rizal nengka om tâk khah a mun chu a lung ân siatin, lung ân kham oka. Khanchu a sa chuangna rithokin a zuang tuma, ava pan a, a popna sabe heia khan siriak neh uain a buak pêka. Khanchu a ma sa chungah khan ân chuanga, amah chu kea lonin khaulbûk (mikhual- thlung in) tiang a fe puia, a donsui tâk. A tûka chu tangka inika a sapa, khaulbûk enkoltu a pêka, “Lei donsui inla, a chung a nî thâmka. ki hong kîr tikin nang tuak ki ti,” ati pêk a.

Samari mi’n namdang ai ṭangpui angka ngirin eini iamtu hei khomin ei nam neh ei chipui hei bang ni loiin nam danghei khom, lung inkhamin, an ṭatna rang thil ei sin pêk ngai rang a nit.

Richang spel rang: Luka 10:27: Khanchu ani khan, “Pumapa ni Pathian chu ni lungril murdin, ni ringna murdin, ni râtna murdin, ni lunginṭong murdin lung ni thlung rang a nit. Nangmah lung ni irthlung angkan ni bungahei lungthlung roh, ’ a ti,” itin a sâma.

Tongridon: 1. Suam mi tongpu kha i mi (nam) mani ?
2. Suam mi tongpu ṭangpui nuam ino hei kha tuhei mani ?
3. Suam mi tongpu ṭangpuitu kha tumani ?
4. Hi riseina rithokin iamtu hei hin ingkanim sin ei tho rang ?

Risei rang 36
Richongpa neh Lazara
(Luka 16:19-31)

Risei rang thiltum: Thi nunga soal rilet arfêna om khâi mak.

Tianlaia khan chu naipanghei hin itar mani. mani nêka ulian heiin tui ichoi mani, thing ipêl mani, puak inei hei hi an risak ngaia, an lom tak tak ngai a. Hingkana isan ringai hei isan a, von itamhei ifâk ipea, tui rihâl hei tui i-in rang pêkna châng iria hei hi Pathian lom lam tak a nit ngai a. Ei pi, ei pu hei khomin “Sem, sem, dam, dam” an lei ti ngai. A omzia chu midang hei zianga ei thil nei isem hi dam sotna an nuam thu an isîrna a nit. Midang hei ta ranga mani thil nei ipê phal ino chu thi nungin an rithla dûzoka ai fe rang a nit.

Tianlaia khan mi richong tak khatka a oma, archong thlia khom puan man itam isilin, hoi inhâia lêngin a om ngaia, Pathian uksakna khom nei ngai maka.

Khante, kha richongpa inkot bula khan inriangte, richongpa dochama bu ÷ul hei irût ranga ngak a om a, arming chu Lazara a nit. A pumkan a pân a, a pân khah Ui heiin an iliak pêk ngaia. An riang thlia khom a pân risupêk rang tak khom nei maka, richongpa dochama bûrmal i÷ul ifa rang ingakin sûntin ai om ngai a nit. Khannise ani chu Pathian thuzom mi a nita, ifa rang nei no khomse raiifân takkan richongpa bûrmal i÷ul ifan, a damsung hun ai mang a nit. Richongpa rêkin chu uksak loiin, ÷angpui nuam ngai make.

Richongpa neh Lazara hei chu an thi seng seng tâka. Lazara chu Vantirton heiin an zuang ÷hũa, richongpa rêk chu Pathian thu zomino hei omna dûzoka a fea, a om tâka. Kha mun kha Pathian iam inohei, inru mihei, mi that ngai hei omna ranga siam a nit.

Dûzoka khan richongpa chu ina tuangin a rung vong vong a, rivan tiang a hang enin chu, matona a kot bula ÷hung ngai kutdo Lazara, Pathian thu zom ngai kha chu Pathian ziangah raiifân takka om a hang mu tâka, arzuk tak taka, ama lak chu

dûzok meidila deng inthei takkan iza. iza itin a khêk, a khêk tâka. Mi richongpa rithla ina tuang, lunginzînga om khan Lazara zianga om Pathian Abraham a an iti kha a hang isam a, “Epa Abraham, lung nêk kham inla, Lazara khan a kut ÷im tuiyah ichia sela, kê lei indâi rangin ne zuk tirpêk roh, hi meiah hin ki nat bâk bâk sikin,” a tia.

Khannise, Abraham, “Ki naipa, ni ring laiin thil i÷ha murdi ni donga, Lazara rêk chu a ÷hano murdi ai dong khah reh-roh ba ! khan ani chu atuna hin ihoi takkan a om tâka, nang chu ina tuangin ni om tâk a nit. Khabana tutu a nuam khomin hi tiang ata kha tiang an kâi theino na rang neh kha tiang ata hi tiang an hong kâi theino na rangin, ei karah hin rinêng ichat inthûk tak ai om kêng,” ati pêk a.

Mi richongpa, a damlaia Pathian thu zom nuam inopa rithla chu dûzok meidilah ina natinsat tak ituangin ai om mai tâk a nit. A ta rangin chu a damlaia a soalna hei insîra, rilet khan omzia ai nei thlak khâiino a nit.

Mitinin ei damlaia ei sintho angka chitin Pathianin ei chungah roi a ne lai rêlpêk rang a nit. Damlaia Jisua Krista iama sin i÷ha sintu hei chu rivanah lomman mûng an ta, sin isual isintu hei rêk chu dûzok meidila ina tuangin an iom kumkhua rang tâk a nit. Thi nunga soal insîr neh rilet hi arfêna om khâiino nih.

Richang spel rang: Luka 16:31: Khante, Abraham a khan, “Mosia neh zânthlahei thu a ôi non chu mithi lai ata thoinokhei thu khom takson ual no nih,’ a ti pêk a,” a ti a.

- Ïongridon:**
1. Richongpa inkot bula kutdo kha im arming?
 2. Lazara kha i-natnam ai nei?
 3. Lazara athi a khan tak tiangim ai om?
 4. Richongpa athi a khan tak tiangim ai om?
 5. Dûzok meidil neh rivan ram kara im a om?
 6. Richongpa kha itho sika dûzoka ai om im?

Risei rang 37
Numeinu nai a kaiithoi
(Luka 7:11-15)

Risei rang thiltum: Mi bei'ndonghei ƚangpuitu chu Jisua a nit.

Nain khua hi Baibila Luka riziak tino chu mundangah riziak omak e. Nain khua hi atunlaia Nazaret khua hi simtiang mël 6 ka la om ini ranga iam a nit. Nazaret khua a rithokin chu ke a hei ife phak thei a nit. Jisua neh a koilom hei chu Kapernaum khua rithokin Nain khua an fe a. Kapernaum khua rithokin Nain khua chu mël 10 ka vëla la ning a ti. Jisua chu minriseitu roi'npui tak a nit sikin a koilom hei neh a fena kipah a thusir ringai rang neh a sintho rikhel isabeiin mi tam takkan an izui dül dül ngai a nit. A sintho rikhel masa tak Kana khua tui uain an chang zoro khoma khan mi tam takkan an i-iam phak a nit.

Jisua chu a hong lian thiaia, kum 30 mi a hong nitin chu sin itho a hong iphut tak a nit. Khotin arfang vela, thil iƚa sinin damino an dam a, mitdel hei mit an var peka, kuariset hei an var peksa ngaia.

Sûnka chu Jisua neh a koilom hei Kapernaum khua a rithokin Nain khua tiang ipanin an hei fe a. Nain khua chu itlâng panga om a nita, arvël kan rikula hual riai a nit. Jisua neh a koilom hei khah kho daikot an thlungin chu, mithi an hong rizona, anu nai neisun a nita, ama lak chu numei a nita. A khua mihei itam takka an om sa a.

Mithi hei kha rilângin an irzon ngai a nit. A nu nai neisun a nit sikin a nu khan ân pâm oka, arngai khom a siat tak taka, idorka lungnat iom im ai nit rang tâk ! Anu khan a thi tâk sikin thlân puanin a tuama, iphûm rangin an irzon tâk a nit. Arzontu hei kha anu neh lompui heiin an zuia. Jisuan mithipa nu kha a mun chu a lung ân siat oka, khanchu ava naia, “Ƥapno roh,” ai ti pêk a nit.

Mithi rizontu hei neh a zuitu hei chu an iding riai tâka, Jisuan mithi tiang ava pan a, arlâng khah a tûka, “Tlangval thoi roh, nang ki ti,” a tia. Khanchu tlangval kha thlan puana rituam pumin a hong iƚhung zela, ai ƚongsuak tâk a nit. Jisuan anu ziangah, :Ni naipa chu

a hong ring nok tâk, ni inah fêpui ta roh,” itin a rila. Anu chu a rai afân tak tak tâka, raiifân takkan in tiang an fê tâk. Iphûm ranga lompui a hong hei khan an mun chu arkhêl an tia, an lompui ok a, Pathian an inpâk tâk. Numeinu khan, a naipa inring pêk nokpu Jisua thurchi chu mihei ziangah â sîr ngaia. A beidong, lungzîng laia Jisua rualƚa a mu sikin a rai a fân ok a. A naipa neh râiifân takkan an iom nok thei tâk a nit.

Mi bei'ndong, lusûn khom nisela Jisua neh an ritongin chu an ta rangin raifanna roi'npui tak Jisuan ai sinpêk ngai angkan, Jisua hi tiklai khomin mi murdi ta ranga ƚangpuitu nai mai anit sikin Jisua ziangah om mai tum ei ti u.

Richang spel rang : Lapui 54:4: Ringai ta, Pathian chu ne ƚangpuitu a nit a; Pumapa chu ki ringna hoitu a nit. a ti a.

- Ƥongridon:**
1. Numeinu khan nai izakâm ai nei?
 2. Jisuan mithi khah a mun ingkam ai tho kha?
 3. Mithi rilâng a tona khan im ai ti kha?
 4. Mi bei'ndong lusûn hei rualƚa kha tumani?

Risei rang 38
Jisua sinrikhel sinhei
(Thurchi tha Johana sunga)

Risei rang: Pathian rangin chu ite sinthei ino omake.

Thuma: Pathianin hi rammual neh rivan ai siam a nit, thil tinreng neh miring tinreng hi a thilsiam a nit. Rivana om arsi, ithla neh ini hei khi Pathian kut suak rong a nit a. Khannise Pathianin a siam lai tûtên an muno sikin arkhêlin rethei make. Vuani chu Jisuan mitin mitmua a sintho rikhêl a then hei ei irsei rang a nit.

Riseirua: Zoroka chu kana khua rineina ruai a oma. Rineina a khan Jisua neh a koilomhei khom an fialsa a. Ruai an hong phutin chu uain arsam tâka. Khante Jisuan tuibêl heia khan tui insip rangin isomhei kha a rila. Khanchu tuibêl heia khan tui an sung insip zoiin chu, Jisuan atun chu thâl unla sem ta rei a tia. An thâla an sem tâka, matona uain nekân athlum uala, arkhêl an tia. Jisuan tui bêla tuihei khah uain a inchang tâk a nit (Joh 2:2-11).

Sûnka chu Galili dîl râl itlanga afe laiin mipui sang itam takkan an zuia, khannise an ni hei fâk ipe rangin koilom heiin itê nei maka, kha zoro a khan naipangte barli bai ringaka neh inga nei a oma. Kha bai neh inga kha Jisuan that a vura mipui hei kha ân thunga ibai neh inga kha koilom heiin an sem pêka an khop chit an fâk nungin an fâk bân khamlu somleinika an la rût noksa (Joh 6:8-12).

Kholoika chu koilomhei kha dîla an zu fea rikuanga an chuanga dîl râl Kapernaum tiang an pana. Zân khom a hong zîng tâka, khante dîlah rikuanga an om laiin Jisua tui chungah a ke'n a hong lon an hei mun chu koilomhei khah an ti tak tâka, khannise, Jisuan tino rei keima kêng ki nit a tia, an ziangah rikuanga a chuanga, khanchu varâl an kâi tâka (Joh 6:19-21).

Khante, sûnka chu Jisua afê malamin a suak ata mitdel a mua, kha mitdela kha lung ân khama, rinênga a chila, a chilin ibuan a siama a mit a not pêka. Khanung chu Jisuan Siloam dîlah ni mâi va phi roh ati pêka, a mâi ava phi zoiin chu a mit a

hong vâr tâk.(Siloam chu “Itir” or fê roh itina a nit). Joh 9:1-7.

Zoro khatka chu Betheni khua Lazara dam maka a thia ithlana an phûm tâka. Sûn lika nungah Jisua kha Khua a khan a hong thlunga. Lazara farhei kha beiindong neh rithlavâi takkan an lei oma. Khannise Jisuan Lazara chu ithlan ata kha a kâi ithoia miriam iring ân chang nok tâk (Joh 11:1-44). Hi ban khom hih Jisua sinrikhêl itam takka a om sa, khannise vuani chu hi tenah hi ei irsei rang tâk a nit.

Richang spel rang: Johana 2:11: Jisuan hi sinrikhêl masatak hih Galili rama Kana kuaah a sin a, a roinpui tlia ân lang a, a kôilômhei khan amah an iam tâk a.

Tongridon:

1. Tu kua'am Jisuan tui uain a in chang?
2. Jisuan mipuihei a vâina kha ibai izakâm neh inga izakâm ai nit?
3. Mipuihei fâk bân khah khamlu izakâm an irût insip?
4. Jisuan mitdela mit kha ingkam a indam?
5. Mithi Lazara kha sûn izâka nungam Jisuan ai kâiithoi a inring nok?
6. Lazara hi tak kho mi mani?

RISEI RANG - 39

Pumapa Zanbu Sakramen

(Sinthohei 16:33, Efesi 4:5-6, Hebrai 9:15-17)

A thu tlangpui: Sakramen iti tongkam hih Latin tonga “Sakramentum” ata ıla a nit a, thil iserh rithiang murdi isirna tongkam a nit. Baptisma neh Pumapa zanbu chungchang isiran “Sakramen” an lei hong mangna bi chu Latin Baibil (vulgate) in hi tongkam hi a lei mang sik a nit.

1. Sakramen Rithiang: Lungthlungna Thuthlung entirna neh risinsiana det entirna a nit. Krista ei ringai inlut iti namindettu a nit. Koindang neh rammual mihei danglamna inlangtu a nit. Pathian thu angka taka Kristaa Pathian sinitho ranga lungril ipe leta rilânna a nit. Sakramen hih amah neh rizomna det inei rang neh rithla tianga takna nei ranga a Koindanghei ta ranga inrifûk a nit.

2. Sakramen kam omna: Sakramen kam omna bi chu, a sakramen thilah omaka, an rifuktua khom omaka, a dongtua khan a kam omzia chu a irngat a nit. Thurchiṭha bua, Kristian sakramen ai namindet chu inikah Baptisma neh Pumapa Zanbu a nit. Hi hei hih sinthotu, idik takka namindetnahei ni non chu an mang rang ni make. Sakramen nitna hih sirinfel intak tak a nit. “Sung tiang neh Rithla tianga thil iṭha, putiang neh imu thei imanga risinsiana” itin isir a nit. Sakramen hih Koindang ringatna bul a nit banah Koindang zepui ichoitu a nit sikin, ılı takka ringai rang a nit.

3. Baptisma Sakramen: Baptisma Sakramen poimona chu rithla tiang lutna a nei sikin Jisua Krista’n a inding a nit iti irian ringai inlu rang a nit. Baptisma chang ino chu Koindanga itep ni mak. Baptisma omzia chu tuia phûm, tuia chia, tui indui ti a nit. Baptistu Johanan sual riletta baptisma chang rangin mihei ân risei Johana baptisma chu “Riletta baptisma/sual izana baptisma ti a nit.

4. Jisuan Baptisma a chang: Jisua khom Johana ziangah baptisma a chang. Baptisma a chang lai takin, rivana rithokin rôl a zuanga, “Ama hih ki Naipa lungthlung tak, ki lom tak taka kha a nit, itin (Mt.3:17). Jisuan mi a baptis iti iria ni no khomse, a koilomhei ziangah chu ama iam murdihei chu baptis rangin thu a pek (Mt.28:19-20). Baptisma chu Kristian an nit iti risinsiana masatak a nit. Ama hih Koindanga sin ilian tak a nit. Baptisma chu Pa neh Naipa neh Rithla Rithiang rilinga baptis itho hih a nit. Khanniseh, baptisma chang ringot hih ṭhatna pe thei maka, baptisma changhei khah Pathian thu inrisei mai rang a nit.

5. Baptisman ai entir: Baptisma hih, “Krista nerthlannta” ai entir a nit. Pathian ṭhatvurna ipe’n a om iti ririat suakna neh sual izana entirna mangrua poimo tak a nit. Baptisma chang chu Jisua iamtu nitna hei, a thisena sual izanahei, rithlaa suak nokna hei, nai nitna pomnahei, kumtluang ringna chang ranga thoinoknahei entirna neh risinsiana a nit.

6. Minriseitu: Baptisma omzia naipanghei an bet ngit thei rang lama inrisei itum rang a nit.

7. Tongṭaina: O Rengpa, baptisma risinsiana kin ichang hih nangmah neh damlai sunhei itep thei ranga ne sinsiam rangin nang kin nge. Kin Rengpa Jisua rimingin, Amen.

8. Richang spell: Lapui 90:12 Kin damlai sunhei tep rang tlia nen risei inla, varna lungril kin nei theina rangin.

9. Tongridon:

- 1) Sakramen iti hih itong mani? (Latin tong)
- 2) Krista’n Sakramen ai namindet khah im ai nit? (Baptisma neh Pumapa zanbu).
- 3) Johana khan tum ai baptis? (Jisua)
- 4) Baptisma hin im ai entir? (Krista ritlanna)

RISEI RANG - 40
Jisua ihemden a om
(Mathaia 27:15-55, Lk.23:1-56).

A thu tlangpui: Jisua suak rang thu neh a thi rang thu zanthlahei lei rillokna itam takka a om a. Zanthla Isaia khomin a thi rang thu a lei thanginthei (Isa.53:1-12). A damlai sun murdiheiah khan inpakna neh choinrisangna a dong ni omake. Jerusalema inlaltakka a lût ni tino chu. Jisua riming omzia chu “**Jehova chu Saninringtu**” tina a nit.

1. Rom sorkar inlal lai: Jisua a thi zoro hih Rom sorkar inlal lai a nit a, an lal tak chu **Tiberia** a nit. An lal murdi chu **Kaisara** ti riming an riput ngaia, khasikin Tiberia Kaisara an iti ngai a nit. Juda ram hih Rom sorkar thuneina nuaia om a nit a, rambung dang dangah khom optu an sia chita, Juda ram Jerusalema hin **Pilata** a oma, Galili rama **Heroda** ai om a nit. Khante, Jisua kha kum 33 a nit tak a. A damsungah khan tlangpui ringaihei a tlangpuaia, rithlavaia om hei thlangamna a pek ngai sikin a koilomhei khan “**Rengin la tlung a ti**” an ti a, an ilung an inringam, iiam khom an iam tak tak a.

2. Jisua imanin a om: Khante, a hunbi hong tluk rangah khan, rikul enihoi tak **Gethsamani** an itia khan a koilomhei neh an fe a. A koilomhei kha mun khatkatah tongtai rangin an oma, ani lak rithlavain a koilomhei ziangah, “Hi takah hin om unla, ne rakpui rei” a ti a. Hi ni zan hi an man rang ni zan a nit tak a. Khante, a tongtaia, “Epa ithei a nitin chu hi kilat hi ne khai pek roh, nikhomseh nercham cham ni riseh” a ti a. A hong kir noka a nitin chu a koilomhei kha a inin a hong mua, an ziangah darkar khatka te lua khom nin ne irakpui thei ino na! atunah hin kei chu misualhei kutah imanin ki om rang tak a nit, a ti a. Khanchu, manmihei an hong, tokmolhei, thalhei, chemseihei an hong choia, Jisua an man taka, an mantu chu **Juda Iskariota** a nit. Kha lai takah khan Petara a hong thoia, a chem a thuata, mi khatka kuat a sat peka, khampa kha Malka ti a nit. Khante, Jisuan Petera ziangah, ni khandai khah a siana munah se roh, khandai mi thathei chu khandai ngirin thing an ti, a ti a. Khanchu, Jisuan

lungkhamin an dam noka. Khante, imana a omah khan a koilomhei chu an ti rai sikin tute a ziangah om ngam om khai maka. Jisua chu roireltuhei makungah, a roirel rangin an thui tak.

- 1) Ana makungah
- 2) Thiampu lal Kaiafa inah
- 3) Sanhedrin makungah
- 4) Roireltu Pilata ziangah
- 5) Heroda makungah.

3. Ihemden a om: Roireltuhei makungah a ding zoin chu Pilata ziangah ihemde rangin an pek taka. An hemdena rang **Kros** inriputin an fepui tak a. Kros kha isol nengka riputin a lirpuia, an nuam an loa, an itoka, a lua linglukhum an inkhuma, khanchu Krosa an hemde tak a, an hemdea tlang kha Hebrai tongin **Golgotha**, Latin tongin **Kalvari** ti a nit. Jisua an hemde krosa khan misual inikah an hemde sa a, kha hei kha **Dimoka** neh **Tita** iti a nit. Dimoka khan ero tong imangin, Pathian nai ni nitin teh nang khom zok inla, keini khom nen zok roh ba! a ti a. Nikhomsela, Tita khan chu, “Jisuan ni ram ni tlungin ne remai roh” a ti a. Jisuan, “Vuanah hin ki ziangah Paradis a om sang ni ti” a ti a. Mi tam takkan an tep theina rangin inriatna riziaka om chu “**Jisua Judahei Reng**” iti hih Hebrai tong, Rom tong neh Grik tonghein an riziaka.

Khante, Jisua rol iring takkan, “Eloi, Eloi lama Sabakthani” (Ki Pathian, ki Pathian ithom ni ne maka” itin a kheka, khanchu arthla a thla tak. Khanchu, ninu a hong ininga, rammual a hong inthima, khotlar a zuang rileka, tek a tula, Biak ina puanzar a zuang tlera, mi tinin arkhel an ti a. Hi mi hi Pathian Naipa a nit nget hih an ti a. Jisuan, misualhei tuang rang sik a lei tuang tak.

4. Krosa a tongbai sarikahei: Jisuan Kros lera ikhaia a om laiah khan tongbai sarikah ai nei hei chu hihei hih an nit.

- 1) Epa, anni hei hih iza roh, an sintho an iriat ino a nit.
- 2) Vuani ki ziangah Paradisa om ni ti.
- 3) Nupangnu en ta, ni naipa hih, enta ni nu hih.
- 4) Ki Pathian, ki Pathian ithom ni ne maka.
- 5) Ki tui arhal.
- 6) Epa, ni kutah kerthla ki bang.
- 7) Arzoi tak.

5. Richang spell: Luka 23:43 Jisuan a ziangah ‘Tong nang ken kung, vuani ki ziangah Paradisa om ni ti’ a ti peka.

6. Tongridon:

- 1) Jisua a thia khan kum izakam ai nit tak?
- 2) Jisua kha tu roireltuhei ziangam an iṭhui kha?
- 3) Jisua mantu khah tum ai nit?
- 4) Petara khan tu kuar im ai sât khah? (Malka kuar)
- 5) Jisuan Tita ziangah, im ai ti pek?
- 6) Jisua Judahei reng iti khah iṭong inm an irziak khah?
- 7) Krosa khan Jisuan tongbai izakam ai nei kha?

Nikhua Poimohei:

TÛM IBÂN PATHIANNI (PALM SUNDAY)
(Johana 12:12-16; Mat.21:1-11; Mk.11:1-11; Lk.19:28-40)

Thurchi Ṭha ilikahei hin Jisua inlal takka Jerusalema a lût thu hih isir a nita, nikhomseh Johana riziak bangah hin tûm iban thu isirin a oma. Khasikin tûm iban thu Johana riziak tiang ithlek ualin isir a nit.

1) Jerusalem khuua mihei khan Jisua inlal takkan Jerusalema hong a ti, ti an lei riata. Jisuan dam inohei an dama, ithihei a kaiithoia, a thusirhei khom an lei riat taka. Khasikin Jisua kha imu an nuam tak tak sikin a don rangin tûm iban ichoin an suak taka. Baibila itûm hih Felna neh Pathian naihei rithla tianga an ratna entirna isir a lei nit. (Lapui. 92:12)

2) Ṭhenkan Jisua chuanga rang Sakuartung chungheiah neh a fena rang lampuiheiah, an puan an dapa, ṭhenkan sol an sata, lampuiheiah khan an dapa, khanchu Jisua kha Sakuartung chungah khan a chuanga tak a. Lompuihei khan Jisua kha choinrisangin an ipaia, “Hosana, Pumapa rilinga zuang chu inpakin om riseh. Ram zuang ithlung rang ei Pa Davida ram chu inpakin om riseh. Anchungtakah khin Hosana” itin an ikhek a nit. Hosana ti chu saninring roh tina a nit.

3) Hi zoro hi Kalkan Kût zoro a nita, Judahei nuaidap inika neka tam Jerusalema an ife ngai a nit. Ruaituhein ithat an tum iti khom a riat lenga. Nikhomseh, Messia a nitna mitin riatah inlang rangin huaisen takkan Sakuartung chungah chuanga Reng angkana langin lût khomseh, “**RINGEINA RENG**” nitna silin ai lût a nit. Renghein Sakuartung chungah an chuanga chu ringei an nuam tina a nit a, Sakor chungah an chuanga chu ridoi an tum tina a nit. Jisua chu ridoina Puma angkan ni loin, ringeina Puma angkan Jerusalem ai lût a nit.

4) Sakuartung chungu chuanguin Jerusalem chu a lût taka. Ama hih Zanthla Zakaria thu lei rillok a hong idikna a nit (Zakaria 9:9). Jisua chu Israel Reng angkan chubai an lei una, Davida Rengram inding ranga hong angkan an lei itung a nit.

5) Zion nainu ti hih Jerusalem neh a sunga omhei isirna a nit. Jerusalem hih History neh Thuthlung Lui Theology bul a nit banah Pathian lei irthlang khopui rithiang a nit. Nikhomseh Krista khah thina ata a thoinok nungah khan chu nuai Jerusalem ni khai loiin, rivan Jerusalem a ikhin tâk a nit.

6) Jerusalem a lut zoroa lei ilomtuhei ngei khah Krosa hemde noktun an init angkan atunlai iamtu, Saninringna dongtuhei ngir hih Krista noltu ei init nok thei a nit.

7) Jisuan Sakuartung chungah inlal takka chuanguin Jerusalem a lût angkan, atunlai iamtuhei ziangah hin inlal takkan ei ziangah lût ai nuam a nit.

8) A damlai sùn hek rang tiang voikah mang mang inlalna tluk isila Jerusalem khopui rithiang ai lût angkan ama iamtuhei khom nikhuakah chu inlalna puan isilin nuai ram ima'n khopui Rithiang, Jerusalem ithar ei lai lût rang a nit. La phuatu khomin, Nena tum ban choia, O, Salem thar rifang ki ngakmo a ti.

Jisua Thoinokna (Easter Sundat)

Luka 24:1-35

A thu tlangpui: Thoinokna hi Kristianhei ringatna lungphum idet tak a nit. Thoinokna hi om no sela chu Kristian sakhua ti hih rammualah om no nih. Thoinokna hi thil rikhel tak khatkah a nita, Krista neh a sinthotheina rianohei ta rangin chu iam intak tak a nit. Ringna hih thina boin chu arkip ino a nita, thina khom thoinokna boin chu arkip ino a nit, thoinokna khom Krista zara roinpui takka thoinokna a nit non chu arkip ino a nit.

1. Thoinokna iam intak: Tianlai Judahein chu ra masa ruai the hi kum tin an nei ngaia. Kha ni a khan chu butelhei hi an hong choia, Pumapa maah an ilan ngai a nit. Kalkan kût a rithoka a sun thumni a nit. Khante, Jisua kha ithlanah iphumin a oma, thlan sungah a zal lai khomin a thihei laiah thu a zu sira, a koilomhein “ARKHELNA” an tia. A thi lai lakah khan rammual a hong inthima, ninu a hong ininga, puanzarhei a zuang tlera, a roinpui tak taka. Thoinok kiti lak teh a ti ngeia, a tak tak chu ai nit rang mani, an tia.

2. Thlan sung an en: Khante, zing takah khua a la var ma'n, Mari Magdaleni (Magdala rama mi), Joani neh Marihei kha thlan ien rangin i ti pumin an fea. Thlan lak kha zan khua vara sipaihei iveng a nita. Khante, ithlan an hei tlungin chu a kharna lung kha inlumpain an mua, Petera khan thlan sung kha a hei enin chu puanzel ban chu ite dang mu maka. Vantirton puan ngoi isil hi a lei i thunga, an ti tak taka. Khanniseh, ani khan, ti no rei, Jisua nin izong khah hin om khai make, a thoinok tak, a ti a. Khanchu, an rualhei iril rangin an itlana, an hei itlan laiin Jisua lampuia an ritongpuia, “CHIBAI” a ti a. Khanchu, Mari Magdaleni ziangah an lara, kha zoin EMAU lampuia malrifakahei ziangah neh koilomhei ziangah an lar noka. Voi itam takkah an ziangah an lar sikin a thoinok nget iti an riatinfela, ringlana sip Thoma khomin a iam indet taka. Kha angkah khan, Krista neh rizomna det ineihei chu netu ringnun inein ei lai thoinok rang a nit. Thi nikna khan ei chungah thu nei thei khai no nih.

3. Thi nunga thoinok: Pastor Wilkerson-in a thi tak a thoinok thu a sirna a khan, Indonesia ramah mi khatkah sun nik ikaia lei ithi tak a oma, a nam khom a siat ok taka. Ram lumna rama omhei chu dan naranin an thi nia rithokin darkar 6 nungah chu taksa hi a siat riphuta, a nam khom a siat tak ngai, a ti a. Khante, voikah chu lusun insungkuahei bulah kin iþhung laiin Pathianin ki lungrilah ifiang larkan a thi kha uap unla, la sakini zai rei, khanchu a thi kha kai ithoi ki ti, itin ki riata. Khanchu, Pumapa, lungril rithiang nen nei inla, kin laiah zuang om roh, ki tia. Khante La voi 7/8 kin hang sakini chu a hong changa, a thoi taka. Khanchu, a þunghei ziangah khan, “Jisuan rinengah a ne inkir nok tak a nit, ki suapuihei, thil poimotak nangni ril rang ki nei. A khatnah chu, thi nungah hin ringna hi ai mong zel ni loin, a bul arphut rang chak hi a nit. Sun nikah ki thi a nit iti ki riatinfel. A niknah chu rivan ram neh dukmun hi ai om tak tak a nit. Ni damlain, Jisua ni nei non chu dukmun inrit takah ni fe rang a nit iti reh roh” a ti a. Khasikin, thoinokna hi Jisua sikin ai om nget a nit iti hih a lei ritemheia rithokin ai felin ipom indet ai poimo ti tak a nit.

Pentikos (Sinthohei 2:1-21).

- | | |
|------------------|---------------------------|
| 1) Kalkan K ût | 2) Pentikos K ût |
| 3) Ritlanni K ût | 4) Bai cholh þangino K ût |
| 5) Totorot K ût | 6) Dangdi K ût |
| 7) Ramasa K ût | |

Hi hei laia a nikna PENTIKOS KÛT iti hih risei ranga ei inuam chu a nit.

1. Pentikos Kût: Pentikos iti hi Grik tong a nita, a sun 50na tina a nit. Kalkan K ût a sun sarini RAMASA ruai an itia rithoka tepa a sun 50na a hong chuk kaneh an imang ngai a nit. An mang ngai dan nek nek chu Levidan itepin ire thei a nit. Jisua thi zoro kha Kalkan K ût zoro a nita, kha zoroa khan Jerusalemah Judahei murdi neh ram danga omhei murdi khom an hong, hi Pentikos K ût hih an imang ngai a nit.

2. Iti neh Rithla vain an om: Khante, Jisua koilomhei kha itï neh rithlavain an oma, Judahei lakin iman itumin an zonga. Jisua Krista khan OLIVE tlangah rivan tiang a fe rang toa, a koilomhei ziangah, Jerusalem mah no rei, Pathian thil inkung ki isir nin iriat khah lei ngak rei, ai ti khah an lungrilah an riat lenga. Jerusalem chontan inchungtakah khan itï neh rilonthing pumin an oma, Pathian thil inkung Thlangamtu ne pe rang ai ti khah im ai nit rang tak na! an ti a.

3. Thlangamtu a zuang tlung: Pentikos ni a hong tlung taka. Judahein an tho ngai dan angka an omna in heia khan Pathian lekhabuhei an tepa, an tongtaia, La an saka, thiampuhein maichamah thil an lana. Koilomhei chu a ranin in khatka ta ahin an iþhunga. Kha zoro takah khan a koilomhei omna neh an rualhei omna in khah a hong ining dur dur taka, chontan sungah khan ilei i-ang zekkan mei angka an ziangah a zuang inlara, an lu chungah a chuang chit taka. Khanchu an lungril lomnan a hong sip taka. A tong murdi khah Galili rama mi an nita, nikhomseh, tong dang dang neh ram dang danga mi neh khualmi

danghei thusir khah arngaituhei murdin suakpui òng angka chitin an riat sikin arkhel an ti a.

Zanthla'n a lei isir "Sun nungkhonah chu mi murdi chungah ker-thla bun ki ta" ai ti kha a hong itlung tak a nit hih te.an ti a. Kha nia rithokin chu òina neh indopna nei khai maka, an rithla arngama, ihai takkan Pathian thu an isir tak.

4. Rithla petu Rithla: Pathianin Rithla a zuk itir khah a iamtuhei iompui ranga a zuk itir a nit. Koilomhein idiar ngeika an lei ingak khah Rithla ringamna an muna chu a nit. Khasikin, Rithla Rithiang chu a iamtuhei iompuitu, thlangam isaktu, invartu, inngamtu neh thusir theina ritha petu a nit. Rithla Rithiang nei inohei chu Pathian Naiheia be nimak iti Pathian thu'n a ne inrisei a nit.

Risei rang – 31.
Krismas Lom om
(Mt. 1:1-21, Lk 2:1-52)

A thu tlangpui: Krismas hih rammual pumpuia iamtuhei ranga kumka sunga nikhua roinpui tak a nit. Ei ram tlanga Koindang omna tin khomah Krista suak lomna entirnan mipuin ruaithena nein hi ni sun hih ichâmin ei imang ngai a nit.

1. Pathian thiltum roinpuia: Pathianin a Naipa lungthlung tak Jisua Krista a khan a thiltum rithup inlangin a oma. Pathian mangrua ranga a lei inrifuk zanthla itam takkan Krista (Messia) suak rang thu thang an lei itheia, Baptistu Johana khomin thang a lei ìnthei a nit. (Mk. 1:2-7). A zuang inzirma rang nungak rithiang Mari neh Josefa a lei inrifoma, thini denin rifom takkan a lei inrifuk a nit. Kha angka Judai ram Bethlehema Saninringtu Krista chu a zuang suak tak. Nikhomsela, Krista suak ni hih mi tam takka hei Saninringna neh rimangna a nit.

2. Buaina neh lungkângna ni a nit: Birip (December) thla hi a tlangpui lomna, buaina neh lungkangna ni a nit. Jisua Krista suakni (Birthday) ei imang hih mivar lekhathiamhei rilfia dan chu a nuaia angka hin a nit.

- 1) Ram tina Kristian a ònhein nunkhohoia nikhua an mang ni a nit.
- 2) Sumpuan tham intam ni a nit.
- 3) Ranhein an ringna an ichan intam ni tak a nit.
- 4) Naihein Nu neh Pahei chung a ngencho risang ni a nit.

Hi sikah hin Thurchi Tha mitin ta rang iti hih iamtuhei laiah, a lut dan iria izakam om an ti ti hih mimal chita risutfia òl tak a nit.

3. Birip 25 hih Krismas ni nimak iti selna: Palestina ramah chu fur hih Thlaphal (November) thla bul ata Ritun (March) thla ten hih a nita. Khasikin, ingkanim Berapuhein Bera vengin zanah phulah an riak thei ranga? Hi sikah hin Tharlak (April) thla ruaitui tlakma hi iiam a om ual. Khabanah, Birip (December) thla furlai zoro takin chu inzin vel an tak rang sikin

ram optun riteppui (census) itho rangin thu isua no nih, iti a nit. Nikhomseh, hi thu hih an sut ok nungin Birip (Dec) 25 ni hih a tlangpuin Krismas ni tia mang a nit. Kha angka 25 ni hi an riziakna masatak chu Philocalian Calender Rom mihein, A.D. 336 vela an lei imangah kha a nit, Kha ni ata chu Birip 25 nia hin Krista chu Judai ram Bethlehemah a suak iti a nit tak.

4. Mang dan ri-ang nona: Birip 25 hi a tlangpuin lei imang ni khomseh, Koindang dang dangah neh mun thenah chu mang dan a danglama, khasikin a thenin Vatchang (Jan) 6, Ritun (March) 28, Tharlak (April) 18-20, Idoi (May) 20, Ritang (Sept) 29 hei hih an lei imang a nit.

Khante, mang dan mumal a om rak khai no nungah khan Jerusalem Bishop St. Cyril khan Rom khopuia Bishop JULIUS ziangah khan, i nikhua tak him imang niseh a idik tak rangin ni iam? itin a hang ridona. Ani khan, lei imang tak Birip 25 hih a dik tak rang neh a tha takin ki riat itin a sama. Khaten khomah khan Jerusalem tianga Koindanghein chu A.D. 549 idenin Vatchang (Jan) 6 ni hih an lai mang mai a nit. Khante, Julius thi nungin Rom Bishop LIBERIOUS a khan mi murdin Birip thla 25 hih Krista suak ni dik tak angkana mang riai rang takin thu a sua taka. Vuani ten idenin ei imang mai tak a nit.

5. Krismas iti hin itang itamkah a nei: Hi hei hih Krismas thu neh arman a nit. 1) Krismas Rose, 2) Krismas Tide, 3) Krismas Box, 4) Krismas thilpek siana, 5) Krismas Cactus, 6) Krismas Daisy, (18th centurya Misonarihei lei imu suak), 7) Krismas Tree, 8) Krismas Card, 9) Krismas Father. Hi hei sungah hin chi nikah a thurchi ibelsa'n isir a nit.

a) Krismas Tree: Hi Krismas tree ti hih ngaidan tlangpuin MARTIN LUTHERA itho suak iti a nit. Krismas zoro, zan zing butin ifarthing omna munah a va fea. Khante, chungtiang a hang tangin chu thingna phaivua isem inning siai siai hei kara si-ar ritle sap sapka var hi a hang mua, a en a hoi a ti tak taka. Kha mun ata a suakin chu thing itangte a khiaka, naipanghei lom rang neh en rangin a thil mu kha insungah a

siam, thing itangtea khan patchon, ivur entirna neh sathai meiser entiman a khop tak a. Hi tho dan hih Martin Luther a thi nung khomin a thotu dang tute iria ni khai mak iti a nit. Kha angka atunlai khomah hin a then itam takkan chu an in kolheia neh insungheiah an siam ngai. Khabanah, nuhein Biak ina thingher an lei ichoi ngai khom khah Martin Luther a rithok ningati iti an iiam a nit.

b) Krismas Card: A siam masatak chu J.C.Horseley a nit. Kum 1843 a khan a rualtha Sir Henry Cole ranga ai siam a nit. Kha Card sungah khan sungkua om khOm hei lem a siama, a nuaiah khan “**Krismas lomom neh kumthar raifan iom chubai nang kin un**” itin an chuanga. Kum 1862 khan London press “**Charles Goods all and sons**” an itia khan izuar thei rangin inson a nit. Kum 1865 a khan Loius Pravy'n ranga vo a phut. Kum 1875 a khan America (USA) ramah imang iphut a nit.

A siamtun ai tum tak chu Jisua Krista hih Ringei Reng a nit zia inlang ai nuam a nit. Khasikin hi Saninringna nikhua roinpui tak miriamhei ziangah ilan ai nit angka insungkua ringei tak neh inrual takka mang hih Pathian thiltum rithup inlanga om chu a nit. Hi sika hin a nit La phuat khomin, a then lungril ina khom dam rise ai ti a nit. Hi card hih a tunlaia ei mang dan neh a thil tum hih rinai sai ino angka a ilang a nit.

6. Minriseitu: Krismas, tum itha taka mang inuam nin om im? Krismas ingkanim imang nin itum? Krismas mang indik thei nget rangin inria tum rang a nit.

7. Tongtaina: Lung ne thlungtu kin Pathian, kin Reng Jisua Krista suak ni, ne hong ithluntu Pathian ni nit sikin lomthu kin isir. Ilom takka mang thei ranga ne tangpui rangin kin Reng Jisua rimingin nang kin ngen, Amen.

8. Richang Spel: Mt. 1:21. Naipa nei a ta, arming Jisua ni sak rang a nit; ani khan a mihei an soal ata ai saninring rang a nit,” a ti a.

- 9. Tongridon:** 1) Krismas iti hi im a omzia? (Krista ruaiṭheni).
- 2) Birip 25 hih Krismas ni dik taka mang rangin tum an puang kha?
(Rom Bishop Liberious)
- 3) Krismas iṭang itia rithokin ni riat tak inikah sam roh.
- 4) Krismas Card siam masatak khah im ar-ming? (J.C.Horseley).
- 5) Krismas card hih tik kuma siam mani? (Kum 1862).
- 6) Krismas card an insonna khah im ar-ming? (Charles Goods all and sons).
- 7) Krismas card hih a siamtun im a inentir nuam tak? (Krista Ringei Reng a nit zia).